

ጳውሎስ ኦሮሜ አሳሰ ጳፊዳ ኪታ ጊዶ ቆፋ

ሃዋሬ ጳውሎስ ኪታይ ኦሮሜ አሳሰ ጳፊዳይ ጳውሎስ ኦሮሜን ዲዛ ዋሳ ኬላዮ ጋኪ ቤያናሰ ቆፒዳ ገሻሰ ኢስቲ ኢዛ ገጌቲ ናጋና ማላ ኤሪሳናሳ። ጳውሎስ ዲዛ ቆፋይ ኦሮሜን ዲዛ አማኒዛ አሳራ ጉላ ዋዴ ኦሊዳፔ ጉዬ ኢስቲ ኢዛ ማዲኮ ኢዚ ኢስፔኔ ቢታ ባናሳ፤ ኢዚ ባሰ ጌሊዳ ማላ ኢስታሰካ አማኖይ ጌሊን አማኒዛይቲ ባ ዱሳን አማኖ ቤሳና ማላ አማኖ ቲሚርቲ ሃኖ ኢስታሰ ኡባ ቢርሺ ጳፊዳስ፤ ጳውሎስ ኪታይ ኩሜል ጊዱ ቤቲዳይ ሃይሳ ሃ ኪታዛና።

ጳውሎስ ኦሮሜን ዲዛ አማኒዛ አሳሰ ባ ሳርካ ዬዲዳፔኔ ኢስታሰ ኢዚ ዋሳና ቃላ ጌሊዳፔ ጉዬ ባ ኪታሰ ዋና አይፌ ዮኦ (1፡17) «ጸሳፌ ቤቲዛ ጸሎቴል አማኖኔ አማኖስ ጊዱዳ ማላ ሚሺራቾ ቃላን ቆንጪዳስ» ጊዛ ቃላ ጊዱዳይሳ ቤሰሰ።

ሄሳፌ ጉዬ ጳውሎስ ሃይሳ ሃ ቆፋዛ ጉጂ አሲ ጳፊስ፤ አይሁዳታካ ጊዱን ዋይኮ ሃንኮ ዳሬ አሳ ጊዱን አሲ ወሪካ ናጋራሰ ሃሬቲዳ ገሻሰ ጸሳራ ማቃይናናሰ ቤሰሰ፤ አሳይ ጸሳራ ማቃይናና ዳንዳይዛይ ዬሱስ ኪርሰቶሳን አማኖና። ሄሲ አሳይ ጸሳራ ዶሚዳ ኦራላ ኢሲፊቴላ አይፌይ ኦራላ ዴኦ ጊዱዳይሳ ጳውሎስ ሎኤሊ ኤሪሰሰ፤ አማኒዛዳይ ጸሳራ ሳርን ዴኤስ፤ ጸሳ አያና ባጋራ ሄሳዳይ ናጋራፔኔ ሃይቆ ዋልቃፌ ዋዜቴስ፤ ሽምፖ 5-8 ጋካናሰ ጳውሎስ ጸሳ ዋጋ ገሻሲኔ አማኒዛይታ ዴኦን ኦሊዛ ጸሳ ጸሎ አያናሰ ቆፋይ አዛኮ ቆንጪሰሰ። ቃሴካ ጉጂዱ ጳውሎስ፡ «አሳ ዜሬላ ገሻሰ ጸሳሰ ዲዛ ቆፋ ጊዶን አይሁዳይኔ አይዛቤይ ኢሲፌ ኦይኬታናሰ ዳንዳይዜ?» ጊዛ ኦይሾሰ ዛር አማናሰ ባጼቴስ።

ቃሴካ ጳውሎስ ቆንጪሲዳ ማላ አይሁዳቲ ዬሱሳ አማኖንታ አቲዳይ ጸሳ ቆፋ ማላ፤ ሄሲካ ሃኒዳይ ዬሱስ ኪርሰቶሳ ባጋራ ጸሲ ቆንጪሲዳ ኢዛ አቶቴላ ኪያን ኩሜል አሳ ዜሬሊ ወሪካ ጋኪ ኤካና ጋላናሳ፤ ጊዶ አቲን አይሁዳ አሳይ ዬሱሳን አማናና ዋዴይ ያናይሳ ጳውሎስ አማኔስ። ወርሴላን ጳውሎስ አማኖን ዋኒ

ዴእናኮኔ ሃራፔካ አማኒዛይቲ ባ ጋርሳን ባስ ዲዛ ጋይቶቴላን ሲቆ ኦጌ ካላናስ ቤሲዛይሳ ኢስታ ኤሪሴስ። ጉጂዲካ ኢስታስ ጸሳ ኦሶ ጊሻስ አማኒዛይቲ ባ ዴሬ ጊሻስ፥ ባ ጋርሳን ኢሶይ ኢሳ ናጋናስ ቤሲዛ አላፌቴላ ጊሻሲኔ ቆፋፔ ዴንዲዛ ኦይሻታ ኡባ ሁኤን ሁኤን ኤሪሴስ።

ሃ ማጻፋይ ኦይኪዲ ኩሜላ ቆፋ

ሃ ማጻፋዚ ኦይኪዲ አይፌ ቆፋታ 1:1-17

አሳ ናስ አቶቴሊ ኮሼስ 1:18—3:20

ጸሲ አሳ ና አሺዛ ኦጌ 3:21—4:25

ኪርስቶሳ ባጋራ ቤቲዛ ኦራላ ዴኦ 5:1—8:39

ኢስራኤሌ አሳይ ጸሳ ቆፋ ጋርሳን 9:1—11:36

አማኒዛ አሳ ሎኦ ኦሶ 12:1—15:13

ወርሴላ ሳሮካ 15:14—16:27

¹ ዩሱስ ኪርስቶሳ አይሌኔ ሃዋሬ ጊዳናስ ጴይጌቲዳ ሚሺራቾ ቃላ ዮታናስ ጳውሎሳፔ ኪቴቲዳ ኪታ።

² ሄ ሚሺራቾ ቃላ ጊሻስ ካሴ ናቤታ ባጋራ ጌሻ ማጻፋታን ኡፋይሲ ኢሜቲዴስ።

³ ሚሺራቾ ቃላይካ ባ ናዛ ጊሻስ ኢዚ አሾ ባጋራ ዳዊቴ ዜሬላፌ ጊዲዳይሳ ዮቲዛ ጊሻሳ።

⁴ ሄሳቶካ ኦ ጎዳ ዩሱስ ኪርስቶሲ ባ ጌሻቴላ አያናን ሃይቆፔ ዴንዲዳይሲ ኢዚ ጸሳ ና ጊዲዳይሲ ጌታ ዋለቃን ቆንጨዴስ።

⁵ ኪርስቶሳ ሱጎላ ጊሻስ አማኖጎታ ዴሬይ አማናና ማላኔ አዛዜታና ማላ ኢዛ ባጋራ ኦኒ ሃዋራቴላስ ጋሊዛ ኪያቴላ ኤኪዴስ።

⁶ ኢንቴካ ዩሱስ ኪርስቶሳይታ ጊዳና ማላ ጴይጌቲዳይታራ ዴታ።

⁷ ጸሳን ዶሴቲዳይታኔ ጌሻታ ጊዳናስ ጴይጌቲዳ ኦሮሜ ቢታን ዲዛ ኡባስ ኦ አዋ ጸሳፌኔ ኦ ጎዳ ዩሱስ ኪርስቶሳፔ ኪያቴሊኔ ሳሮቴሊ ኢንቴስ ጊዶ።

ጳውሎሲ ኦሮሜ ቤያና ላሞቴላ

⁸ ኢንቴ አማኖይ ኩሜላ አላሜን ሲዬቲዳ ጊሻሲኔ ኢንቴ ጊሻስ ታ ጎዳ ጸሳ ዩሱስ ኪርስቶሳ ባጋራ ጋላታይስ።

⁹ ታ ኢንቴ ጊሻስ ኡባ ዋዴ አይ ማላ ቆፒዛኮኔ ጸሳ ና ሚሺራቾ ሳባኮን ታ ኩሜላ ዋዚናፔ ኢዛስ ኦሊዛ ጸሳይ ታስ ማርካ።

10 ታኒ ታ ዋሳን ኡባ ዋዴ ኢንቴና ቆፓይስ፤ ሃኢ ቃሴ ወርሴላን ጸሳ ሼኔ ጊዲኮ ታ ኢንቴኮ ባና ማላ ጸሲ ታስ ኦጌ ዶያና ማላ ዋሳይስ።

11 ኢንቴ ሚናና ማላ ማዲዛ ኣያና ኢሞታ ታ ኢንቴ ጊሻሲኔ ኢንቴና ኣይፌራ ቤያናሰ ላሞታይስ።

12 ሄሲካ ኢንቴኒኔ ታኒ ኢሶይ ኢሳራ ኣማኖን ሚኔታናሳ።

13 ታ ኢሻቶ! ሃራሶን ኣማኖንታይታ ማታን ታስ ሃኒዳ ማላ ኢንቴ ማታንካ ታስ ኦሶ ኣይፌይ ቤታና ማላ ዳሮ ዋዴ ቆፓዲስ ሺን ሃኖ ጋካናሰ ታ ዲጌታዳ ዲዛይሳ ኢንቴ ኤራና ማላ ኮያይስ።

14 ታማርዳይታስ ጊዲን ታማርንታይታስካ፥ ኤራታሲኔ ኤያታስ ኡባስ ታ ቦላ ታማርሳና ኣጮይ ዴስ።

15 ኢንቴስ ኦሮሜን ዲዛይታስካ ታኒ ሚሺራች ቃላ ዮታናሰ ታ ኣሞቲዛይ ሄሳሳ።

16 ኣማኒዛይቲ ወሪ ኣታና ማላ ጸሳ ዋልቃ ጊዲዳ ጊሻስ ታኒ ሚሺራች ቃላን ዬላቲኬ፤ ሄሲካ ኮይሮ ኣይሁዳታስ ካሊዲ ኣይዛቤታሳ።

17 «ጸሎይ ጸሳ ኣማኖን ዴስ» ጌቴቲዲ ካሴ ጸፌቲዳ ማላ ጸሳ ጸሎቴሊ ሚሺራች ቃላን ቆንጨና፤ ሄ ጸሎቴላይ ኮይሮፔ ወርሴላ ጋካናሰ ኣማኖን ሃናና።

አሳ ናይታ ኢታቴላ

18 ቱማ ባ ኢታቴላኒኔ ማካላን ቱጨ ኦይኪዛይታ ኢታቴላ ቦላኔ ኢስታ ማካላቴላ ኡባ ቦላ ጸሳ ሃንቆይ ሳሎፔ ቆንጨና።

19 ኢስቲ ኤራናሰ ቤሲዛዝ ጸሲ ኡባ ኢስታስ ቆንጨሲዳ ጊሻስ ኢስቲ ጸሰ ኤራናሰ ቆንጨፎ ጊዲዴስ።

20 ኣላሚይ ሜዴቶሶፌ ሃ ሲሚን ኣሳ ኣይፌን ቤቲ ኤርንታ ጸሳ ሃኖቴሊ ሄሲካ ኢዛስ ዲዛ ሜርና ዋልቃይኔ ጸሳቴላይ ኢዚ ሚዴዳ ሜዴቴላን ቆንጨን ቤቴስ፤ ሄሳ ጊሻስ ኣሳይ ሺሻና ጋሶይካ ዴና።

21 ኢስቲ ጸሰ ኤሪኮካ ኢዛ ጸሳቴላ ማላ ኢዛ ቦንቹቤቴናኔ ጋላቲቤቴና፤ ጊዶ ኣቲን ኢስታ ቆፋይ ሜላ ጎኣይ ባይንዳዝ ጊዲዴሲኔ ዩሺ ቆፖንታ ማላ ኢስታ ዋዚናይ ቆሚዴስ።

22 ኢስቲ ባና፥ «ኤራ» ጊዛይታ ጊዲኮካ ኤያታ ጊዲዳ።

23 ሜርና ጸሳ ቦንቾ ሃይቂዛ አሳኒኔ ካፎታን፤ ሜሄታኒኔ ቢታ ቦላ ጎሼቲዛ ሜጴቴላታን ሚሳቲሲዲ ላሚዳ።

24 ሄሳ ጊሻሰ ጸሲ ኢስታ ባ ጊዶን ኢሶይ ኢሳራ ባርካ ባ አሳቴላን ቱና ኦሶ ኦላና ማላ ጌሻቴሊ ባይንዳ ላይማቴላሰ አሊ ኢሚዴሰ።

25 ኢስቲ ጸሳ ቱማቴላ ዋርዶን ላሚዳ፤ ሜጴዳ ጸሳ አጊዲ ሜጴቴላሰ ጎይኒዳኔ ኢስታሰ ኦሊዳ፤ ሜጴዳ ጸሲ ኢዚ ሜርናሰ ጋላቴቲዳይሳ። አሚን።

26 ሄሳ ጋሶን ጸሲ ኢስታ ዩላቺዛ አሞቴላሰ አሊ ኢሚዴሰ፤ ኢስታ ማጫሳቲ ካሴ ሎሴቲዳ ጋይቶቴላ ዋጋ ሎሴይ ባይንዳ ዋጋን ላሚዳ።

27 ሄሳሳካ አቱማ አሳይ ባሰ ቤሲዛ ማጫሳታራ ዚንኣናይሳ አጊዲ አዴይ አዴራ ዚንኣናሰ አሞን ጸጌቲዲ ማጫሳታራ ዚንኢዛ ማላ አዴይ አዴራ ዚንኢዲ ፓላ ሚሽ ኦሊዳ፤ ሄይታንቲ ባርካ ባ ኦሊዳ ኢታ ኦሶዛሰ ቤሲዛ ቀጸቲ ባ ቦላ ኤሂዳ።

28 ቃሴካ ኢስቲ ባ ቆፋራ ጸሰ ኤርይ ኦና ማዴና ጊዳ ጊሻሰ ኢስቲ ኦላናሰ ቤሶንታይሳ ኦላና ማላ ጸሲ ኢስታ ጎኦንታ ቆፋሰ አሊ ኢሚዴሰ።

29 ኡባ ባጋራ ማካላኔ ኢታቴላ፡ ዪቄኔ ኢታ ኦሶን ጸላላ ኩሚዳ፤ ቃናቴቴላን፡ ሸምፖ ዋጶን፡ ኦሻን፡ ባሌሶኒኔ ጌኔን ኩሚዳይታ ቃሴካ ዚገርዛይታ ጊዲዳ።

30 አሳ ሱንላ ሞሪዛይታ፡ ጸሰ ኢጲዛይታ፡ አሰ ጫዪዛይታ፡ ኦቶራንቻታኔ ጩቄቲዛይታ ጊዲዳ፡ ኡባ ዋዴ ኢታ ኦላናሰ ኦጌ ኮይዛይታ፡ ባና ዩሊዳይታሰ አዛዜቶንታይታ፡

31 ዩሺ ቆፖንታይታ፡ ጊዳ ቃላ ዛሪ ላሊዛይታ፡ አሳሰ ሚሹቶንታይታ፤ ሜንጼ ኢታታ።

32 «ሄሳ ኦሊዛይቲ ወሪካ ሃይቃናሰ ቤሴሰ» ጊዛ ጸሳ ዋጋ ኢስቲ ኤሪሼ ሄይታንታ ባሰ ኦሶ ጸላላ ጊዶንታ ሄሳሶ ኦሊዛይታካ ሚንጬቴሰ።

2

ጸሳ ፒርዳ

1 ሄሳ ጊሻሰ ኔኖ ሃራ ቦላ ፒርዲዛይሶ ኔኒ ታ ሃኒ ጋሶን ኦላዲሰ ጊዛ ጋሶይካ ኔሰ ዴና፤ ኔ ሃራ አሳ ቦላ ፒርዲዛይሳን ኔርካ ኔሰ

ኩናኔ ኤካሳ፤ ጋሶይካ ሃራ አሳ ቦላ ኔ ፒርዲዛይሳ ኔካ ዛራዳ
ኢዛ ኦሊዛ ገሻሳ።

² ሃይታ ማላታ ኦሊዛ አሳታ ቦላ ጸሳ ፒርዳይ ሊኬ ገዲዳይሳ
ኑ ኤሮሰ።

³ ሄሳ ገሻሰ ኔ አሳ ቦላ ፒርዳሼ ሄ ኔ ፒርዲዛይሳ ዛራ
ኦሊዛይ ገዲኮ ኔ ጸሳ ፒርዳፌ ኬሳ ኤካ አታና ኔሰ ሚሳቲዜ?

⁴ ዋይኮ ጸሳ ኪያቴሊ ኔና ማሮቴላኮ ካሌሊዛይሳ ሻካ ኤሮንታ
ዳሼ ኢዛ ገታ ኪያቴላኔ ኢዛ ዳንዳያ ዱሬቴላ ኔ ሌቃይ?

⁵ ገዶ አቲን ኔኒ ኔ ዋዚና ሙሚቴላኒኔ ማሮቴላ ኮኾንታ ኔ
ዋዚና ጋሶን ጸሳ ቱማ ፒርዳይ ቆንጨዛ ዋዴ ጸሳ ሃንቆ ጋላሳሰ
ኔ ቦላ ዳሮ ሃንቆ ሺሻሳ።

⁶ ጸሲ ኢሳሰ ኢሳሰ ኢዛ ኦሶ ማላ ኢማና።

⁷ ሎኦ ኦሶ አጎንታ ኦሊዲ ቦንቾ ሳባኔ ሜርና ዴኦ ኮይዛይታሰ
ሜርና ዴኦ ኢማና።

⁸ ገዶ አቲን ባርካ ባና ደሲዛይታሲኔ ቱማ አጋገዲ ኢታ
ካሊዛይታ ቦላ ፒርዳይኔ ሃንቆይ ጋካና።

⁹ ኢታ ኦሊዛ አይ አሳ ቦላካ ኮይሮ አይሁዳ አሳ ቦላ፣ ካሊዲ
አይዛቤታ ቦላ ዋዴይኔ ሜቶይ ጋካና።

¹⁰ ገዲኮካ ሎኦ ኦሊዛዴሰ ኦናሰካ አይሁዳ አሳሰ ገዲን
አይዛቤታሰ ሳባይ፣ ሳሮቴሊኔ ቦንቾይ ገዳና።

¹¹ ጸሲ ኦናካ ሻኪ ማዴና።

¹² ካሴ ዋጋይ ኤቆንታ ዋዴ ናጋራ ኦሊዳ አሳይ ዉሪካ
ዋጋይ ባይንዳ ጳያና፤ ዋጋይ ኤቂ ሲሚን ናጋራ ኦሊዳይቲ ዋጋን
ኦይኬቲዲ ፒርዴታና።

¹³ አይሰ ገኮ ጸሳ አቻን ጸሎ ጌቴተዛይቲ ኤቂዳ ዋጋሰ
አዛዜተዛይታፔ አቲን ዋጋ ሲሰ ሲዪዛይታ ጸላ ገዴቴና።

¹⁴ ዋጋይ ባይንዳ አይዛቤቲ ዋጋይ ዮተዛይሳ ጮ ሚላ
ሃኖቴላፌ ኤሪዲ ኦሊሺን ኢሰታሰ ዋጋይ ባይንዳ አገኮካ ኢሰታሰ
ሚዴቴላ ዋጋይ ዲዛ ገሻሰ ኢሰቲ ባ ኦላናይሳ ኤሬቴሰ።

¹⁵ ኢሰታ ዋዚናይ ኢሰታሰ ማርካቲዛ ገሻሲኔ ኢሰታ ቆፋይ
ኢሰታ ዋቲዛ ገሻሰ ቃሴካ ኢሰታ ማዲዛ ገሻሰ ዋጋይ ዮተዛይ
ኢሰታ ዋዚናን ጸፊቲዳይሳ ኤሬቴሰ።

¹⁶ ሄሲካ ታ ሚሺራቾ ቃላን ታማርሲዛ ማላ ጸሲ አሳ ዋዚናን
ቆቴቲዳይሳ ኪርሰቶሳ ባጋራ ፒርዲዛ ጋላሳን ቆንጨሳና።

አይሁዳታኔ ኢሰታ ዋጋ

17 ኔ ኔና አይሁዳ አስ ጊኮ ዋጋን አማኔታሳኔ ኔስ ጸሳራ ዲዛ ኢሲፌቴላን ጨቁታሳ።

18 ዋጋ ካለዛ ጊሻስ ጸሳ ሼኔ ኤራዳ ኩሜል ጊዲዛዝ ሻካ ኤሪዳ ጊዲኮ።

19 ኔ ቆቁታ ካሌሊዛዴ፤ ቆማን ዲዛይታስ ፖኦ ጊዲዳይሳ ኔ አማኔቲዳዴ ጊዲኮ

20 ዋጋፔ ኔ ዴሚዳ ኤራቴላኒኔ ቱማቴላን ሃንኮ ኤሮንታይታ ዘሪዛዴ፤ ጉላ ናይታ ታማርሲዛዴ ጊዲኮ።

21 ኔኒ ሃራታ ታማርሶ አጋዳ ኔ ሁኤስ አዛስ ታማርኪ? ኔኒ ሃራ አስ ካይሶቶፓ ጋ ሳባካሼ ኔስ ካይሶታይ?

22 ኔኒ ሃራ አሲ ላይማቶንታ ማላ ዮታሹ ኔስ ላይማታይ? ኔስ ኤቃ ኢጸሳ ሺን ጸሳ ኬላ ሚሻ ቦንቃይ?

23 ኔኒ ዋጋን ጨቁታሳ ሺን ዋጋ ኔ ባጋራ ኦሶንታ አጋዳ ጸሳ ካዉሻይ?

24 ሄሲካ፡ «ኢንቴ ጋሶን ጸሳ ሱንሊ አይዛቤታ አቻን ጫዬቴስ» ጌቴቲ ጸፌቲዳ ማላ ሃኒዴስ።

25 ኔ ዋጋ ናጋ ፖሊዛዴ ጊዲኮ ቃጸራስ ጎኣይ ዴስ፤ ኔ ዋጋ ኦሶንታዴ ጊዲኮ ቃሴ ኔ ቃጸራይ ጮ ሃዳ።

26 ቃጸራቶንታ ዲሼ ዋጋይ ጊዛይሳ ፖሊኮ ቃጸሬቲዳዴራ ገና ቆዴቴኔ?

27 ኔስ ጸፌቲዳ ዋጋይኔ ቃጸራይ ኔስ ዲኮ ዲዛ ዋጋ ኔ ናጎንታዴ ጊዲኮ ሃንኮ ቃጸራቶንታ ዲሼ ዋጋስ አዛዘቲዳይ ኔ ቦላ ፒርዳና።

28 ኢሳዴይ ጮ ሜላ ሱንላስ አሳ አይፌን ታ አይሁዳ አስ ጊዳና ጊኮ ኢዚ አይሁዳ አስ ጊዳና፤ ቱማፔ ቃጸሬቴሊ ጮ ካሬራ አሾ አይፌን ቤቲዛ ቃጸራ ጊዳና።

29 ጊዲኮካ ኢሲ አሲ አይሁዳ አስ ጊዳናስ ዳንዳይዛይ ኢዛስ ጋላ ባጋይ አይሁዳ አስ ጊዲሺና። ቃጸራይካ ቃጸራ ጊዲዛይ ጸፌቲዳ ዋጋ ጸላላ ጊዶንታ አያናን ዋዚናፔ ጊዲዳ ቃጸራ ጊዲኮኮ! ሄሳ ማላ አሲ ጋላታ አሳፔ ጊዶንታ ጸሳፌ ዴሜስ።

3

1 ሂስቲኮ አይሁዳ አስ ጊዳላስ አዛ ጎኣይ ዲዜ? ቃጸራይ አይ ጎኢዜ?

2 አዋራካ ጊዲን ጎኣይ ዳሮ፤ ሃራፔ ኮይሮ ጸሳ ቃላይ ሃዳራ አይሁዳታስ አሜቲዴስ።

3 ኢስታፌ ኢሶታሰ ኢሶታሰ አማኖይ ባይንዳ አጊኮ ጸሳን አማኔቴል ዲጊዜ?

4 ሙሌካ ዲጊና! አሲ ዉሪካ ዋርዳንቻ፡
«ኔኒ ኔ ቃላፔ

ዴንዲዳይሳን ቱማንቻ፤
ኔ ዋርኬ ፒርዳንካ ጸናሳ»
ጌቴቲ ጸፊቲዳ ማላ
ጸሲ ቃሴ ቱማንቻ፡፡

5 ኑ ማካላ ኦሶይ ጸሳ ጸሎቴል ቆንጨን ቤሲዛይሳ ጊዲኮ ሂስቲን ኑ አይ ጋኔ? ጮ አሳ ዋጋ ማላ ፓላሜታናሰ ጸሲ ባ ሃንቆ ኑ ቦላ ኤሂዛይሲ ኑሰ ቤሴና ጋኔዬ? ሂሳካ ታ ጊዛይ አሳሶ ቆፋና፡፡

6 ቱማፔ ሂሳሶ ሃኔና፤ ሂሳሶ ሃኒዛ ጊዲኮ ጸሲ አላሜ ቦላ ዋስቲ ፒርዳንዴ?

7 «ታ ዋርዶቴል ጸሳ ቱማቴል ቆንጨሲዛይሳን ኢዛ ቦንቾ ጌዴ ጉጂዛ ጊዲኮ ሂስቲን ሃኢ ጋካናሰ ዋስቲ ታ ቦላ ናጋራንቻ ማላ ፒርዳቲዜ?» ጊዲ ፓላሜታና አሲ ዳና ዳንዳዬሰ፡፡

8 ሂሳ ጉሲ፡ «ሎኦይ ያና ማላ አኔ ኢታ አሶሰ» ጌቴሰ ጊዲ ኢሲ ኢሲ አሳቲ ኑ ቦላ ዋሬሲዛይሳ ማላ፡፡ ሃይታ አሳታ ቦላ ጋከዛ ፒርዳይ ቱሙ ፒርዳ፡፡

አሲ ዉሪ ናጋራንቻ

9 ሂስቲን ኑ አይ ጊኖ? ኑኒ ኢስታፌ አጁዞኒ? ሙሌካ አጽኮ፡፡ አይሁዳታ ጊዲኮካ፡ አይዛቤታ ጊዲኮካ ዉሪካ ናጋራፔ ጋርሳ ባጋራ ዲዛ ጊሻሰ ታ ዉርሳካ ካሴታዳ ኢስታሰ ዮታዲሰ፡፡

10 «ጸሎይ ኦኒካ ዴና፤
ኢሳዴይካ ዴና፡፡

11 ዩሺ ቆፒዛዴይ ባ፤
ጸሰ ኮይዛይ ኢሳዴይካ ባ፡፡

12 ዉሪካ ባሌቲዳኔ
ኢሲ ቦላ ጎኦንታይታ ጊዲዳ፡፡
ሎኦ ኦሊዛይ ኦኒካ ባ፤
ኢሳዴይካ ዴና፡፡

13 ኢስታ ዶናይ ዶያ ዲዛ ዱፎ ማላ፤
ኢስታ ዶናይ ኡባ ዋዴ
ባሌሶ ሃሳዬሰ፤
ኢስታ ሜቴርሻይ

ሾሻ ማርዜራ ዳሰ።

14 ኢሰታ ዶናን ቃንጌሊኔ
ጫሞ ሚሺ ኩሚዳሰ።

15 ኢሰታ ቶሆይ
ሱላ ጉሳናሰ ኤሶቴሰ።

16 ኢሰታ ኦጌን ቶሆይኔ
ለፋቴሊ ዳሰ።

17 ኢሰቲ ሳሮቴላ ኦጌ ኤሬቴና።

18 ኢሰታ ኣይፌሶን ጸሳሰ ያሻቴሊ ባ»

ጌቴቲ ጸፊቲዳ ማላ።

19 ሄሳ ጊሻሰ ዶናይ ወሪካ ጎርዳታና ማላ ዳሬይ ኩሜል ጸሳሰ
ዛሮ ኢማና ማላ ዋጋይ ጊዛይ ወሪካ ዋጋፔ ጊዶራ ዲዛይታሰ
ጊዲዳይሳ ኑ ኤርሰ።

20 ሄሳ ጊሻሰ ዋጋይ ናጋራይ ኣዛኮ ኤሪሴሰ ኣቲን ዋጋ ናጎን
ኦኒካ ኢዛ ኣቻን ጸሎ ጌቴታናሰ ዳንዳዬና።

ኣማኖን ቤቴዛ ጸሎቴል

21 ሃኢ ቃሴ ካሴ ናቤቲ ኢዛሰ ማርካቲዳይሲ ዋጋፔ ካሬራ
ጊዲዳ ዳሳ ጸሎቴሊ ቆንጪዳሰ።

22 ሄሲ ጸሳ ጸሎቴሊ ዬሱሰ ኪርሰቶሳ ኣማኖን ዲማቴሊ
ባይንዳ ቤቴዛ ጸሎቴል።

23 ጋሶይካ ኣሲ ወሪካ ናጋራ ኦሊዳሰ፤ ጸሳ ቦንቾይካ ኣሳ ናሰ
ፓጪዳሰ።

24 ኣሳይ ዬሱሰ ኪርሰቶሲ ኣሳ ና ጊሻሰ ኦሊዳ ኪያቴላፊ
ዳንዲዳይሳን ጮ ሚላ ጸሊዳሰ።

25 ኢዛ ሱላን ጊዲዳ ኣማኖን ናጋራፔ ማሬታና ያርሾ ሂሰቲዲ
ጸሲ ዬሱሳ ሺሺዳሰ፤ ኢዚ ሄሳ ኦሊዳይ ካሴቴዲ ፖሌቴዳ ናጋራ
ቃጸዮንታ ዳንዳያን ኣጂዳ ባ ጸሎቴል ቤሳናሳ።

26 ኢዚ ሄሳ ሃ ዋዴዛን ኦሊዳይ ባ ጸሎቴል፤ ሄሲካ ባ ባጋራ
ጸሎ ጊዲዳ ዬሱሰ ኪርሰቶሳን ኣማኒዛዴ ጸሊሲዛይሳ ቤሳናሳ።

27 ሂሰቲን ኦኒ ኢዛን ጨቄቴዛ ሚሺ ኣዚ ዲዜ? ኣይኮ
ሚሻካን ጨቄቶኮ፤ ኑ ጨቄታና ጋሶይካ ኣዜ? ዋጋ ናጊዛ
ጊሺ? ጊዴና፤ ኣማኖና።

28 ኣይ ኣሲካ ኣማኖን ኣቲን ዋጋ ናጎን ኣቶንታይሳ ኑ ጌሺ
ዮቶሰ።

29 ጸሲ ኣይሁዳታስ ጸላ? ኣይዛቤታስካ ጸሰ ጊዴኔ? ኤ ኣይዛቤታስካ ኢዚ ጸሳ።

30 ቃጻሬቲዳይሳ ኣማኖን ቃሴ ቃጻሬቶንታይሳካ ሄ ኣማኖንካ ጸሊሲዛይካ ኢዚ ኢሲ ጸሳ ጸላ።

31 ሂሰቲን ሄሲ ሄሳ ጊዲኮ ኣማኖ ጋሶን ዋጋ ጎኣይ ባይንዳ ሚሽ ኦሊኖ? ሙሌካ ሄሳሶ ሃኔና፤ ዋጋ ኑ ሚንፋና ኣቲን።

4

ኣማኖን ኣብራሃሜ ጸሊፎቴል

1 ሄሳ ጊሻስ ቃሴ ኑ ኣብራሃሜይ ሃይሳፌ ኣይ ጎኣ ዴሚዴስ ጊኖ?

2 ኣብራሃሜይ ባ ኦሶን ጸሊዲኮ ኢዚ ጨቄታናዚ ኢዛስ ዴሲኮሺን፤ ኢዚ ጸሳ ሲንፋን ጨቄታናስ ዳንዳዬና።

3 ጌሻ ማጻፋይ፥ «ኣብራሃሜይ ጸሰ ኣማኒዴሲኔ ኢዛ ኣማኖይ ኢዛስ ጸሊፎቴላን ቆዴቲዴስ» ጌሰ።

4 ኢሳዴይ ኦሶ ኦሊኮ ኢዚ ኤኪዛ ሚሻይ ኢዛስ ጮ ኪያቴል ኢሜቲዛዝ ጊዶንታ ኢዛዴስ ኦሶ ዋጋ ጊዴስ።

5 ጊዶ ኣቲን ኦሶ ኦሊንታ ናጋራንቻ ኣሲ ጸሊፎ ኬሲዛ ጸሳን ኣማኒዛዴስ ኢዛ ኣማኖይ ኢዛስ ጸሊፎቴላን ታይቤቴስ።

6 ዳዊቲካ ጸሊፎቴል ኢዛዴስ ቆዴቲዛይ ሎኦ ኦሶን ጊዶንታ ኣሳ ጊሻስ።

7 «ኢሰታስ ኢሰታ ባላ ኦሶይ

ኣቶ ጌቴቲዳይቲኔ

ናጋራፔ ማሬቲዳይቲ

ኣንጃቲዳይታ!

8 ኢዛ ናጋራ ጎዳይ

ሙሊካ ቆዶንታዴይ

ኢዚ ኣንጃቲዳይሳ!» ጊዴስ።

9 ሃ ኣንጃዚ ቃጻሬቲዳይታስ ጸላላዬ? ዋይኮ ቃጻሬቶንታይታሳራ? «ካሴ ኮይሮ ኑ ኣዋ ኣብራሃሜ ኣማኖይ ኢዛስ ጸሊፎቴላን ቆዴቲዴስ» ጊዶስ።

10 ሂሰቲን ዋኒ ኢዛስ ሄሳሶ ቆዴቲዴ? ኢዚ ቃጻሬቲዳፔ ጉዬ? ዋይኮ ቃጻሬታናፔ ካሴ? ኢዛስ ጸሊፎቴላን ቆዴቲዳይ ኢዚ ቃጻሬታናፔ ሲንፋና።

11 ኢዚ ካሴ ቃጸሬታናፔ ካሴ ዳሚዳ ዲሎቴላይ ቃጸራስ ማለታ ጊዳና ማላ ዲሎቴላስ ማታሜ ኤኪዴስ። ሄሳ ጊሻስ ቃጸሬቶንታ አማኒዛይታስ ዲሎቴላን ቆዴታና ማላ ኡባታስ ኢዚ አዋ።

12 ኢዚ ቃጸሬቲዳይታስካ አዋ፤ ቃጸሬቲዳይታስ ጸላላ ጊዶንታ ኑ አዋ አብራሃሜይ ካሴ ቃጸሬታናፔ ሲንፌ ኢዛስ ዲዛ አማኖ ጌዶ ካሊዛይታስ ኡባሳ።

አማኒዛ አሳስ አሜቲዳ ኡፋይስ

13 ኢዚ አላሜ ላቲዛይ ጊዳና ማላ አብራሃሜይኔ ኢዛ ዜሬላቲ ኡፋይሳ ቃላ ኤኪዳይ ዋጋ ባጋራ ጊዶንታ አማኖን ጊዲዳ ዲሎቴላና።

14 ዋጋ ናጊዛይቲ ላቲዛይታ ጊዲኮ አማኖስ ጎኣይ ዴና፤ ሂዶታይካ ጮ ሃዳ ጊዳናሺን፤

15 ዋጋይ ሃንቆ ካሌፌስ፤ ዋጋይ ባይንዳሶን ዋጋ ሜንሶይ ዴና።

16 ሄሳ ጊሻስ ሂዶታይ አማኖን ዪዴስ፤ ሄሲካ ኢዛ ሂዶታይ ኢዛ ኪያቲላን ጊዳና ማላኔ አብራሃሜ ዜሬላ ኡባስ አማኔቲዛይሳ ጊዳና ማላ ሃኒዴስ፤ ሄሲካ ዋጋን ኢዛይታ ጊዲዳይታስ ጸላላ ጊዶንታ አማኖን አብራሃሜ ናይታ ጊዲዳይታስ ኡባታሳ፤ ኢዚካ ኑስ ኡባሲካ አዋ።

17 ሄሲካ፡ «ታ ኔና ዳር ዴሬ አዋ ኦላዲስ» ጌቲቲ ጸፊቲዳ ማላ ሃኒዴስ፤ ኢዚካ ሃይቂዳይታስ ዴኦ አሚዛዴን፤ ባይንዳይሳ ቃሴ ዲዛ ማላ ኦሊዛዴን አማኒዳ ጸሳ ሲንላን ኢዚ ኑስ አዋ።

18 ካሴ ኢዛስ፡ «ኔ ዜሬላ ሄሳሶ ሃናና» ጌቲቲዳ ማላ ሂዶታ ኦላናስ ዳንዳዬቶንታ ሚሻን አብራሃሜይ ጸሲ ሃናና ጊዲይሳ አማኒዲ ዳር ዴሬ አዋ ጊዲዴስ።

19 አብራሃሜስ ዬሌቲን 100 ላይሶ ጊዲሺን አብራሃሜይ ባ አሳቲላይ ሃይቁላ ማላ ጊዲዳይሳኔ ሳራስ ዬሎ ዋዴይ አቋ ቢዳይሳ ኤሪሼካ አማኖን ለፒቤና።

20 ጌዴ ጉጂዲ አማኖን ሚኒዲ ጸሳስ ቦንቾ አሚዴስ አቲን ጸሲ ጊዳ ቃላ ሲቋቤና።

21 ጸሲ ኢዛስ አሚዳ ሂዶታይ ፖሌታናይሳ ኩሜላ ዋዚናፔ አማኒዴስ።

22 ሄሳ ጊሻስ ኢዛስ ዲሎቴላን ቆዴቲዴስ።

23 «ኢዛስ ዲሎቴላን ቆዴቲዴስ» ጊዛ ቃላይ ጸፊቲዳይ ኢዛስ ጸላላ ጊዴና።

24 ጊደ አቲን ጸሲ ኑ ጸሎቴላ ኢዛ ባጋራ ታይቢዛ ኑ ጎዳ ዩሱስ ሃይቆፔ ዴገሊዳይሳን አማኒዛ ኑሳራኩ።

25 ኢዚ ኑ ናጋራ ጊሻስ ሃይቃናስ አጂ ኢሜቲዴስ፤ ኢዚ ኑና ጸሊሳናስ ሃይቆፔ ዴንዲዴስ።

5

ሳሮቴሌኔ ኡፋይስ

1 ሂስቲኮ ኑኒ አማኖን ጸሊዳ ጊሻስ ኑ ጎዳ ዩሱስ ከርስቶሳ ባጋራ ኑስ ጸሳራ ሳሮቴሌ ዴስ።

2 ሃይሳ ሃ አማኖዛን ሚኒ ዲዛ ከያቴላን ኑኒ ጌሊዳይ ኢዛ ባጋራ ጊዲዳ ጊሻስ ኡፋይሳን ጸሳ ቦንቾ ጊሼቲ ኤከዛይታ ጊዲዳ ጊሻስ ኑ ኡፋዬቶስ።

3 ሃይሳን ጸላላ ጊደንታ ኑና ጋኪዛ ዋዬንካ ኡፋዬቶስ። ጋሶይካ ዋዬይ ዳንዳያን ጋላዛይሳ ኑ ኤሮስ።

4 ዳንዳያይ ፓጩን ሚኖቴላ ኢሜስ፤ ፓጩን ሚኖቴሌ ሂዶታ ኢሜስ።

5 ሄ ሂዶታይ ቃሴ ኑና ዩላቹና። ጸሲ ኑስ ኢሚዳ ጸሎ አያናን ባ ሲቆ ኑ ዋዚናን ጉሲዳ ጊሻስ ሄ ሂዶታይ ኑና ዩላን ጋሴና።

6 ኑ ዳቡራንቻታ ጊዲ ዲሺን ጸሳ ዋዴይ ጋኪዳ ማላ ከርስቶሲ ኑ ናጋራ ጊሻስ ሃይቂዴስ።

7 ጸሎ አሳ ጊሻስ ሃይቃና አሲ ቤታናይሲ ዳሮ ሜቴስ። ሎኦ አሳ ጊሻስ ሃይቃናስ ጸላና አሲ ኦኔ ኤሪዛይ ቤታና ዳንዳዬስ።

8 ጊደ አቲን ኑ ቡሮ ናጋራንቻ ጊዲ ዲሺን ከርስቶሲ ኑ ጊሻስ ሃይቂዴስ፤ ሄሲካ ጸሲ ኑና ሲቂዛ ባ ሲቆ ሄሳን ቤሴስ።

9 ኑኒ ኢዛ ሱላን ጌዩዳይታ ጊዲኮ ሃራፔካ ኢዛ ባጋራ ጸሳ ሃንቆፌ አታና።

10 ኑ ጸሳስ ሞርኬታ ጊዲ ዲሺን ኢዛ ናዛ ሃይቆን ኢዛራ ጊጊዳይታ ጊዲኮ ኑ ኢዛራ ጊጊዳፔ ጉዬ ኢዛ ናዛ ዴኑ ባጋራ ኑኒ ፓጸዳይሲ ዋኒ ኬሂ ዳሪኔ!

11 ሄሳ ጸላላ ጊዴና፤ ቃሴካ ኑኒ ሃኢ ኢዛራ ጊጋ ዴሚዳ ኑ ጎዳ ዩሱስ ከርስቶሳ ባጋራ ጸሳንካ ኡፋይስ ኦሶስ።

ሃይቆይ አዳሜ ባጋራ፥ ዴኦይ ከርስቶሳ ባጋራ ዪዴስ

12 ሄሳ ጊሻስ ናጋራይ ኢሳዴ ጋሶን ዱጌ ሃ አላሚዛ ዪዳ ማላ ሃይቆይካ ናጋራ ጋሶን ዪዴስ፤ ሃይቆይካ ሄሳ ባጋራ አሳ ኡባኮ

ዪዴስ፤ ሄሳሰ ጋሶይካ አሲ ዉሪካ ኢዛ ባጋራ ናጋራ ኦሊዳ ጊሻሳ።

13 ዋጋይ ኢሜታናፔ ካሴ ናጋራይ ቢታ ቦላ ዴስ ሺን ዋጋይ ባይንዳሶን ናጋራይ ናጋራ ጊዴና።

14 ጊዶ አቲን አዳሜፔ ሃ ሲሚን ሙሴ ዋዴ ጋካናሰ ዲዛ ዋዴን አዳሜ ማላ ዋጋ ሜንሊዲ ናጋራ ኦሶንታይታ ቦላካ ሃይቆይ ካዋቲዴስ፤ አዳሜይ ቡሮ ያና ኪርሰቶሳሰ ለሚሶ።

15 ጊዲኮካ ኢዛ ኪያቴላ አሞታይ አሳ ቆሆ ማላ ጊዴና፤ አሳዴይ ሞሪዳይሳን ዳሮ አሳይ ሃይቁኮካ ጸሳ ኪያቴላኒኔ ኢሲ አሰ ዬሱስ ኪርሰቶሳ ኪያቴላን ዪዳ አሞታይ ዳርታሰ ኬሂ ዳሪ አሜቲዴስ።

16-17 ቃሴካ ጸሳ አሞታይ አሳዴ ባጋራ ዪዳ ናጋራፔ ቤቲዳ አይፌ ማላ ጊዴና፤ ጋሶይካ ኢዛ ፒርዳይ አሳዴ ናጋራ ካሊዲ ፒርዳ ኤኪ ዪዴስ፤ ኢዛ አሞታይ ቃሴ ዳሮ ቆሆ ጋሶን ጸሊሎቴላ ኤሂዴስ። ሃይቆይ አሳዴ ባጋራ ካዋቲዳይሳ ጊዲኮ ዳሮ ቲርፓ ጊዲዳ ጸሳ ኪያቴላኒ ጸሊሎቴላ አሞታ ኤኪዳይቲ አሳዴ ባጋራ ሄሲካ ዬሱስ ኪርሰቶሳ ባጋራ ጸኒዲ ዴኦን ዳና።

18 ሂሰቲኮ አሳዴ ቆሆ ጋሶን ፒርዳይ አሳ ኡባ ቦላ ጋኪዳ ማላ ሄሳሳካ አሳዴ ጸሊሎቴላ ኦሶን አሰ ኡባሰ ዴኦ አሚዛ ጸሊሎቴላ ቤቲዴስ።

19 አሳዴይ አዛዜቶንታ ኢጲዳ ጊሻሰ ዳሮ አሳይ ናጋራንቻ ጊዲዳ ማላ አሳዴ አዛዜቴላን ቃሴ ዳርቲ ጸላና።

20 ዋጋይ ዪን ሞሮይ ዳሪዴስ፤ ጊዶ አቲን ናጋራይ ዳርይሳፌ ቦላራ ጸሳ ኪያቴላ ኬሂ ዳሪዴስ።

21 ሄሲካ ሃኒዳይ ናጋራይ ሃይቆ ቦላ ካዋቲዳይሳ ማላ ዬሱስ ኪርሰቶሳ ባጋራ ቃሴ ሜርና ዴኦይ ቤታና ማላ ኢዛ ኪያቴላ ጸሊሎቴላን ካዋታናሳ።

6

ናጋራፔ ሻኬቲዲ ኪርሰቶሳን ዱስ

1 ሂሰቲን ኑ አይ ጊና? ጸሳ ኪያቴላ ዳራና ማላ ናጋራ ጉጂ ኦሊና?

2 ሙሌካ ጊዴና፤ ኑኒ ናጋራሰ ሃይቁዶስ፤ ሂሰቲን ሃይሳፌ ጉዬ ኑ ዋኒ ናጋራን ዳኔ?

3 ኑኒ ዬሱስ ኪርሰቶሳራ ኢሲኖ ጊዳና ማላ ጸማቂቲዳይቲ ኢዛ ሃይቆን ኑ ኢሲፌ ጊዳናሰ ጸማቂቲዳይሳ ሃይሳ ኢንቴ ኤሬኬቴ?

4 ሄሳ ጊሻስ ከርስቶሲ ባ አዋ ቦንቸን ሃይቆፔ ዴንዲዳ ማላ ኩኒካ ሄሳሶ ኦራላ ዴኑን ዳናስ ጸንቃታን ሃይቂዲ ኢዛራ ሞጌቲደስ።

5 ኩኒ ሄሳ ማላ ሃይቆን ኢዛራ ኢሲኖ ጊዲኮ ቃሴ ዴንላንካ ኢዛራ ኢሲኖ ጊደስ።

6 ሃይሳፌ ጉዬ ኩኒ ናጋራስ አይሌ ጊደንታ ማላ ናጋራ አሳቴላይ ኪቻና ማላ ካሴ ኑ ጨጋ አሳቴላይ ኢዛራ ኢሲፌ ካቂቲዳይሳ ኑ ኤሮስ።

7 ጋሶይካ ሃይቂዳ አሲ ናጋራፔ ሸምፒደስ።

8 ኩኒ ከርስቶሳራ ሃይቂዳይታ ጊዲኮ ኑ ኢዛራ ኢሲፌ ዳናይሳ አማኖስ።

9 ከርስቶሲ ሃይቆፔ ዴንዲዳ ጊሻስ ናምኣንሶ ኢዚ ሃይቆንታይሳኔ ኢዛ ቦላ ሃይቆስ ዋልቃይ ባይንዳይሳ ኑ ኤሮስ።

10 ኢዚ ሃይቂዳ ዋዴ ኢሲቶ ኡባ ናጋራ ጊሻስ ሃይቂዴስ፤ ጊደ አቲን ጸሳስ ፓጻ ዴስ ዴስ።

11 ሄሳሶካ ኢንቴ ናጋራስ ሃይቂዲ ጸሳስ ዬሱስ ከርስቶሳ ባጋራ ፓጻ ዲዛይሳ ኤሪቴ።

12 ሄሳ ጊሻስ ኢታ ኦላና ኮይዛ ኢታ አሾ ቆፋ ኮዬዲ ሃይቂዳ ኢንቴ አሳቴላ ቦላ ናጋራይ ካዋታና ማላ ኦላፍቴ።

13 ኢንቴ አሳቴላ ኢታ ኦሶ ኦሊዛ ሚሽ ኦሊ ናጋራስ ሃሪሶፒቴ፤ ሄሳ ማላ ኦላናፔ ሃይቆፔ ጌዴ ዴኑን ፒኒዳ አሳታ ማላ ኢንቴና ጸሳስ ሃሪሶፒቴ፤ ኢንቴ አሳቴላ ጸሎቴላ ሚሻ ማላ ጸሳስ ሃሪሶፒቴ።

14 ኢንቴ ጸሳ ኪያቴላ ጋርሳን ዴታ አቲን ዋጋ ጋርሳን ደንታ ጊሻስ ኢንቴና ናጋራይ ሃሬና።

ጸሎቴላ ኦሳንቻታ

15 ሂስቲን አይ ኦሊኖ? ዋጋ ጋርሳን ጊደንታ ኩኒ ጸሳ ኪያቴላ ጋርሳን ዲዛ ጊሻስ ናጋራ ኦሊኖ? ሙሌካ ኦላናስ ቤሴና።

16 ኢንቴ ኢንቴና አይሌ ማላ ሺሺዛ ዋዴ ኢንቴ አዛዜቲዛዴስ አይሌ ጊዲዳይሳ ኤሬታ፤ ሄሳሶካ ጌዴ ሃይቆኮ ኤሬዛ ናጋራስ ዋይኮ ጸሎቴላኮ ጋሊዛ አዛዜቲላስ ኢንቴ አይሌ ጊዲዳይሳ ኤሬኬቲ?

17 ኢንቴ ካሴ ናጋራስ አይሌታ ጊዲኮ ኢንቴስ ኢሜቲዳ ቲሚርቲዛስ ኢንቴ ዋዚናፔ አዛዜቲዳ ጊሻስ ጸሲ ጋላቴቶ።

18 ኢንቴ ናጋራፔ ዋዜቲዲ ጸሎቴላስ አይሌ ጊዲዴታ።

19 ሃይሳ ታኒ አሳ ቃላን ኢንቴስ ቆንጨን ዮቲዛይ ኢንቴ ዬሌቴላን ዳቡራንቻ ጊዲዳ ጊሻሳ። ኢንቴ ካሴ ዋዴ ኢንቴ አሳቴላ

አይሌቴላሲኔ ካሴፔ አጁ ኢታና ማላ ኦሊ ኢሚዳ ማላ ሃኢ ቃሴ ጌሻቴላኮ ኤፊዛ ጸሎቴላሰ አይሌ ሂሰቲ ሃሪሲቴ።

20 ኢንቴ ካሴ ናጋራሰ አይሌቴዲ ዲዛ ዋዴ ኢንቴ ጸሎቴላፌ ማላ አቲዴታ ሺን፤

21 ሃኢ ቃሴ ኢንቴ ዬላቲዛ ሚሻታፔ ሄ ዋዴ አይ ጎኦ ዴሚዴቲ? ሄሳ ሄ ሃኖዛሰ ጎኦይ ሃይቆ።

22 ሃኢ ቃሴ ኢንቴ ናጋራፔ ዋዜቲዲ ጸሳ አይሌታ ጊዲዴታ፤ ሄሲካ ኢንቴና ጌሻቴላኮ ካሌፊሰ፤ ዉርሴላይካ ሜርና ዴኦ።

23 ናጋራ ዋጋይ ሃይቆ፤ ጊዶ አቲን ጸሳ ኢሞታይ ጊዲኮ ጎዳ ዬሱሰ ኪርሰቶሳ ባጋራ ሜርና ዴኦ።

7

ኤኮኔ ጌሎ ለሚሶ

1 ታ ኢሻቶ! ታኒ ዋጋ ኤሪዛ አሳታሰ ዮታይሰ፤ ዋጋይ ሸሞፖራ ፓጻ ዲዛ አሳ ጸላላ ሃሪዛይሳ ኢንቴ ኤሪኬቲ?

2 ኢሲ ማጫሲ አዚና ጌሊኮ ባ አዚናራ ኢዛ ዋጋን ቃሼቲዛይ አዚናይ ፓጻ ዲዛ ዋዴ ጋካናሳ፤ አዚናይ ሃይቂኮ ኢዛ ማቾ ጊዲዛ ዋጋፔ አንጄታዉሰ።

3 ጊዶ አቲን አዚናይ ፓጻ ዲሺን ኢዛ ሃራ አዚና ጌሊኮ ላይማ ጌቲታዉሰ፤ አዚናይ ሃይቂኮ ቃሴ ሃራ ኣሰ ጌሊኮ ካሴ አዚና ዋጋፔ አንጄታዲሰ አቲን፡ «ላይማ» ጌቲቲኩ።

4 ሄሳ ጊሻሰ ታ ኢሻቶ! ኢንቴካ ዬሱሰ ኪርሰቶሳ አሳቴላ ባጋራ ዋጋሰ ሃይቂዴታ፤ ኢንቴ ሃይቆፔ ዴንዲዳ ኪርሰቶሳ ባጋ ጊዲን ኩኒ ጸሳሰ አይፌ አይፋናሳ።

5 ናጋራንቻ ሜዴቴላ ሸኔን ኑ ዲዛ ዋዴ ሃይቆሰ ጋሊዛ አይፌ ኑ አይፋና ማላ ዋጋይ ዴንፌሊዳ ናጋራ አሞይ ኑ ቦላ ኦሊዴሰ።

6 ሃኢ ጊዲኮ ካሴ ኑና ዋጲ ቃቺዳ ዋጋሰ ሃይቂዳ ጊሻሰ ሄ ዋጋፔ ዋዜቲዶሰ፤ ሄሲካ ካሴ ጨጋ ዋጋን ጸፊቲዳይሳን ጊዶንታ ዲሼ ኦራላ አያና ኦጌን ኩኒ ኦላናሳ።

ናጋራራ ባጽቴላ

7 ሂሰቲን ኑ አይ ጊኖ? ባ ሁኤሰ ዋጋይ ናጋራ? ሙሌካ ጊዴና። ዋጋ ባጋራ ጊዶንታኮ ናጋራይ አዛኮ ኑ ኤርኮ ሺን፤ ዋጋይ «አሞቶፋ!» ጎንታኮ አሞይ አዛኮ ቱማፔ ታ ኤሪኬ።

8 ናጋራይ ቃሴ ዋጋፔ ኬዚዳ አዛዞይ ቤሲዳ ኦጌን ጎኤቲዲ ታ ጊደን ዲማ ዲማ ኢታ አሞ ዴንፊሲዳስ፤ ዋጋይ ያናፔ ካሴ ናጋራይ ሃይቂዳዛ።

9 ዋጋይ ባይንዳ ካሴ ታኒ ፓጳ ዳይሲሺን ዋጋይ ዩን ቃሴ ናጋራይ ፓጳ ጊዲዳስ፤ ታ ጊዲኮ ሃይቃዲስ።

10 አስ አሻና ቆፊቲዳ አዛዞይካ ሃይቆ ኤኪ ዪዳይሳ ኤራዲስ።

11 ናጋራይ ዋጋ ባጋራ ቤቲዳ ጋሶን ጎኤቲዲ ታና ባሌሲዳሲኔ አዛዞን ዋጂዳስ።

12 ሄሳ ጊሻስ ዋጋይ ባ ባጋራ ጌሻ፤ አዛዞይካ ጌሻ፤ ጸሎኔ ሎኦ።

13 ጊዶ አቲን ሎኦስ ሃኒዳይሲ ታስ ሃይቆስ ጊዲዳ? ሙሌካ ጊዳና፤ ጊዶ አቲን ናጋራይ ባ ናጋራቲላን ኤሬታና ማላ ሎኦ ጊዲዳ ሃኖ ባጋራ ታ ቦላ ሃይቆ ኤሂዳስ፤ ሄሲካ ናጋራይ አዛዞ ባጋራ ካሴፔ አሊ ናጋራ ዳርሲዳስ።

14 ዋጋይ አያና ዮኦ ጊዲዳይሳ ኦ ኤርስ፤ ታ ቃሴ ናጋራስ አይሌ ማላ ባይዜቲዳ አሳ።

15 ታኒ ታ አሊዛይሳ ኤሪኬ፤ ታ ኦላና ኮይዛይሳ ኦላ ኤሪኬ ሺን ታ ኢጲዛ ሚሽ አላይስ።

16 ታ ኦላና ኮዮንታ ሚሽ አሊዛ ጊዲኮ ዋጋይ ሎኦ ጊዲዳይሳ ታ ማርካታይስ።

17 ሄሳ አሊዛይ ታና ጊደንታ ታ ጋላን ዲዛ ናጋራይ አሌስ።

18 ታናን ሄሲካ ናጋራንቻ ጊዲዳ ታ ሜጴቲላ ጊደን አይኮ ሎኦ ሚሺ ባይንዳይሳ ታ ኤራይስ፤ ሎኦ ኦላናስ ታስ አሞቴሊ ዳስ ሺን ፖላ ኦላ ኤሪኬ።

19 ታ አሊዛይ ኦላና ጋዳ ኮይዛ ሎኦ ኦሶ ጊዳና፤ ጊዶ አቲን ታ ኦላና ኮዮንታ ኢታ ኦሶ አላይስ።

20 ታኒ ኦላናስ ኮዮንታይሳ አሊዛ ጊዲኮ ሄሳ አሊዛይ ታና ጊደንታ ታ ጊደን ዲዛ ናጋራ።

21 ሄሳ ጊሻስ ሃይሲ ዋጋይ ኦሶን ዲዛይሲ ታስ ጌሊዳስ። ሄሲካ ታኒ ሎኦ ኦላና ኮያይሲሺን ኢታ አላይስ።

22 ታኒ ታ ጋላራ ጸሳ ዋጋን ኡፋዬታይስ።

23 ጊዶ አቲን ታ አሳቲላ ጊደን አሊዛ ናጋራ ዋጋይ ታና ቃቺ ኦይኪዲ ታ ቆፋ ዋጋራ ኦሌቲዛ ሃራ ዋጋይ ታ አሳቲላ ጊደን አሊሺን ቤያይስ።

24 ታ አይ ማላ ላፋ አሴ! ሃይሳ ሃይቆስ ኢሜቲዳ አሳቲላፊ ታና አሻናይ ኦኔ?

25 ኑ ጎዳ ዬሱስ ከርስቶሳ ባጋራ ጋላታይ ጸሳስ ጊዶ።
ሂስቲኮ ታኒ ታ ባጋራ ታ ቆፋን ጸሳ ዋጋስ ኣይሌ ጊዳሼ ታኒ
ሜዴቴላ ዋጋን ናጋራ ዋጋስ ኣይሌ።

8

ጲሎ ኣያናን ዱሳ ጊሻሲኔ ኣሾን ዱሳ ጊሻሲ

1 ሄሳ ጊሻሲ ዬሱስ ከርስቶሳ ኣማኒዛይታ ቦላ ፒርዳይ ዴና።

2 ጋሶይካ ዴኦ ኣያና ዋጋይ ዬሱስ ከርስቶሳ ባጋራ ናጋራፔ
ኢስታ ጌሺዳ ጊሻሳ።

3 ናጋራንቻ ኣሾፔ ዴንዲዳይሳን ዋጋይ ፖላናስ ዴንዳዮንታይሳ
ጸሲ ባ ናዛ ናጋራንቻ ኣሳ ለሚሶን ናጋራስ ያርሼታና ማላ ዬዲዲ
ፖሊዴስ፤ ሂስቲዲ ናጋራ ኢዛ ኣሾን ፒርዲዴስ።

4 ሄሲካ ኑኒ ኣሾን ጊዶንታ ኣያናን ሲሜሬቲዛ ኑፔ ዋጋይ ኮይዛ
ጲሎቴላ ፖላናሳ።

5 ኣሾ ሼኔ ማላ ዴና ኮይዛ ኣሳታ ዋዚናይ ኣሾይ ኮይዛ ሚሻን
ሼምፔስ፤ ኣያና ሼኔ ማላ ዲዛይቲ ቃሴ ባ ዋዚና ኣያናይ ኮይዛ
ሚሻ ቦላ ዋሌቴስ።

6 ኣሾስ ጸላ ቆፋይ ሃይቆ ጊዲሺን ኣያና ዮኦስ ቆፋይ ጊዲኮ
ዴኦኔ ሳሮቴላ።

7 ናጋራስ ሃሬቲዛ ዋዚናይ ጸሳራ ኦሻ፤ ጋሶይካ ኢዚ ጸሳ ዋጋስ
ሃሬቴናኔ ሃሬታናስ ዴንዳዬና።

8 ኣሾ ሼኔ ማላ ዲዛ ኣሳቲካ ጸስ ኡፋይሳናስ ዴንዳዬቴና።

9 ኢንቴ ቃሴ ጸሳ ኣያናይ ኢንቴናን ዲዛ ጊዲኮ ኣሾን ጊዶንታ
ኣያናን ዴታ፤ ከርስቶሳ ኣያናይ ኢዛ ቦላ ባይንዳዴይ ከርስቶሳስ
ጊዴና።

10 ከርስቶሲ ኢንቴ ጊዶን ዲኮ ቃሴ ኢንቴ ኣሳቴላይ ናጋራ
ጋሶን ሃይቄል ጊዲኮካ ኢንቴ ኣያናይ ቃሴ ጲሎቴላ ጋሶን ዴኦን
ዴስ።

11 ዬሱሳ ሃይቆፔ ዴንሊዳ ኢዛ ኣያናይ ኢንቴ ቦላ ዲዛ ጊዲኮ
ከርስቶሳ ሃይቆፔ ዴንሊዳይሲ ኢንቴ ጊዶን ዲዛ ኢዛ ኣያናይ
ሃይቃናስ ዲዛ ኢንቴ ኣሳቴላስ ዴኦ ኢማና።

12 ሄሳ ጊሻሲ ታ ኢሻቶ! ሄሲካ ሃናናይ ዶሳን ጊዴናሺን ኑኒ
ኣሾ ሼኔ ማላ ዴናስ ኣሾስ ጊዶኮ።

13 ኣሾ ሼኔ ማላ ዲዛ ጊዲኮ ኢንቴ ሃይቃና፤ ኣሾ ኦሶ ኢታዛ
ኢንቴ ኣያናን ዋዲኮ ኢንቴ ዴኦን ዴና።

14 ጸሳ ኣያናን ካሊዛይቲ ኢስቲ ጸሳ ናይታ።

15 ኢንቴ ኤኪዳ ኣያናይ ዛሪዲ ኢንቴና ኣይሌቴላን ሃሪዛ ኣያና ጊዶንታ፡ «ኑ ኣዋወ» ጊ ዳይጊሲዛ ናቴቴላ ኣያና ኤኪዳታ።

16 ኑኒ ጸሳ ናይታ ጊዲዳይሳ ሄ ኣያናይ ባ ባጋራ ኑ ኣያናራ ኢሲፌ ኑሰ ማርካቴሰ።

17 ኑኒ ጸሳ ናይታ ጊዲኮ ኢዛ ላቲዛይታ። ኑ ኪርሰቶሳ ቦንቸዛ ላቲዛይታ ጊዳና ማላ ኣዳፊካ ኢዛራ ኢዛ ሜቶዛ ጊሼቲዛይታ ጊዲኮ ኑ ጸሰ ላቲዛይታ፤ ኪርሰቶሳራካ ኢሲፌ ላቲዛይታ።

ቡሮ ያና ቦንቸ

18 ሃኢ ኑ ኤኪዛ ዋዬይ ቡሮ ኑሰ ሲንላን ጊጊ ኡቲዳ ቦንቸዛራ ጋሊ ዳሊሺን ኣይኮካ ጊዳና ጋይሰ።

19 ሜዴቴሊ ዉሪካ ጸሳ ናይቲ ቆንጫናይሳ ላሞቴላን ናጎን ዴሰ።

20 ሜዴቴሊ ዉሪካ ሜላ ሃዳ ጊዳና ማላ ፒርዴቲዴሰ፤ ሄሲካ ባ ዶሮን ጊዶንታ ሲንላፌሰ ሃሪታና ማላ ኢዚ ባ ሼኔ ማላ ሃሪሲዳ ጊሻሳ።

21 ሄሲካ ሜዴቴሊ ዉሪካ ዳይሳ ኣይሌቴላፌ ዋዜቲዲ ጸሳ ናይታሰ ጊዲዳ ቦንቸቲዳ ሼኔ ማላ ዲዛሶ ጋካናሳ።

22 ሃኢ ጋካናሰ ሜዴቴሊ ዉሪካ ዳሮ ዋዬን ሚጻቲሼ ዲዛይሳ ኑ ኤሮሰ።

23 ኢዛ ጸላላ ጊዶንታ ኮይሮ ጺሎ ኣያና ኢሞታ ዴሚዳ ኑኒካ ኑ ኣሳቴላይ ኣታና፤ ኑ ኢዛ ና ጊዳናይሳካ ላሞቴሼኔ ዋዚናራ ሚጻቲሼ ዶሰ።

24 ሃይሳ ሃ ሂዶታን ጸላ ኣቲዶሰ፤ ሂዶታይ ኣይፌን ቤቲዛ ሚሽ ጊዲኮ ቡሮፔ ናጋና ኮሼና፤ ሃኢ ባ ኣይፌን ቤኢዛ ሚሺ ቡሮፔሰ ናጊዛይ ኣኔ?

25 ጊዶ ኣቲን ኑኒ ቡሮ ኑ ኣይፌን ቤኣንታ ሚሽ ሂዶታን ናጊዛዝ ጊዲኮ ሳሌታይ ባይንዳ ናጎሰ።

26 ሄሳላካ ቃሴ ኑ ዳቡርሺን ኣያናይ ኑና ማዴሰ፤ ኑኒ ዋሳ ዋሰቲ ዋሳናኮ ኤሮንታ ጊሻሰ ኣያናይ ኑኒ ቃላን ቆንጪሳናሰ ዳንዳዬቶንታ ቃላራ ኑሰ ዋሴሰ።

27 ኑ ዋዚና ፓጪ ኤሪዛ ኣያናይ ኢዚ ኣያና ቆፋ ኤሬሰ፤ ጋሶይካ ኣያናይ ጸሳ ሼኔ ማላ ኣማኒዛ ኣሳሰ ኑሰ ዋሴሰ።

28 ጸሲ ባና ዶሲዛይታሲኔ ኢዛ ሼኔ ማላ ዳይጌቲዳይታሰ ኡባሰ ኑሊዛ ሚሽ ኡባካ ሎኦሰ ኑሊዛይሳ ኑ ኤሮሰ።

29 ጸሲ ካሴፔ ባ ኤሪዛይታ ኢስቲ ኢዛ ናዛ ሚሳታና ማላ ካሴካ ዶሪ ዋሊዴስ፤ ሄሲካ ዳሮ ባ ኢሻታ ጊዶፌ ኢዚ ባይራ ጊዳናሳ።

30 ካሴ ኮይሮፔ ባ ዶሪዳይታ ኢስታ ጸይጊዴስ፤ ቃሴካ ጸይጊዳይታ ጸሊሲዴስ፤ ባ ጸሊሲዳይታካ ቦንቹዴስ።

ጸሳ ሲቆ

31 ሂስቲን ሄሳ ኑ ኣይ ጊኖ? ጸሲ ኑናራ ጊዲኮ ኑናራ ኤቄታናስ ዳንዳይዛይ ኦኔ?

32 ባ ናዛስ ሚሹቶንታ ኑ ጊሻስ ኣሊ አሚዳይ ኢዛ፤ ሂስቲን ኡባ ሚሽ ኑስ ኢዛራ ኪያቲላን ዉርሲ ኣዛስ አሜኔ?

33 ጸሲ ዶሪዳይታ ሞቲዛይ ኦኔ? ጸሊሲዛይ ጸሳ።

34 ሂስቲን ፒርዲዛይ ኦኔ? ሃይቄዲ ሃይቆፔ ዴንዲዲ ጸሳ ኡሻቻን ኡቲዳ ዬሱስ ኪርስቶሲ ኑ ጊሻስ ጋናቴስ።

35 ኑና ኪርስቶሳ ሲቆፔ ሻካናይ ኦኔ? ሜቶዬ? ዋዬ? ዋይኮ ጎዴቴሉ? ዋይኮ ጋፋ? ዋይኮ ካሎቴሉ? ዋይኮ ቆፖንታ ጋኪዛ ሜቶዬ? ማሻ?

36 ሄሲካ ካሴ፥ «ኔ ጊሻስ ኑ ሹኬቲዛ ዶርሳ ማላ ቆዴቲዶስ፤ ጋላስ ኩሜሐ ኔ ጊሻስ ኑኒ ሃይቆራ ባጼታና» ጌቴቲ ጸፊቲዳይሳ ማላ።

37 ኑና ኣዚካ ኢዛፔ ሻኬና፤ ሃይሳ ኡባን ኑና ሲቂዳይሳን ጸኒዛይታፔካ ኑ ኣጵስ።

38 ሄሳ ጊሻስ ሃይቆ ጊዲን፥ ዴኦ ጊዲን፥ ኪታንቻታ ጊዲን፥ ዋይኮ ሃኢ ዲዛ ሚሽ ጊዲን፥ ቡሮ ያና ሚሽ ጊዲን፥ ዋይኮ ኣይ ዋልቃማ ጊዲን፥

39 ጵቃ ጊዲን ዋይኮ ዚቃ ጊዲን፥ ዋይኮ ኣይ ሜጴቴሐ ጊዲን ጎዳ ዬሱስ ኪርስቶሳ ባጋራ ኑስ ዲዛ ጸሳ ሲቆፔ ኑና ሻካና ዳንዳይዛ ሚሽ ባይንዳይሳ ታ ሻካ ኤራዲስ።

9

ጸሳ ዶሮ

1 ታ ዬሱሳ ሱንላን ቱሙ ጋይስ፤ ዋርዶቲኬ፤ ታ ዋዚናይካ ጸሎ ኣያና ባጋራ ታስ ማርካቴስ።

2 ታስ ዋዚናፔ ኪቾንታ ጊታ ቆፋይኔ ሚሻይ ዴስ።

3 ታ ዳቦታ ጊሻስ ታ ቃንጌታዳኔ ኪርስቶሳፔ ሻኬታ ዋራ ዋጲዳኮ ዶሳይስ።

4 ኢስቲካ ኢስራኤሌ ናይታ፤ ኢስቲ ጸሓ ና ጊዳና ማላ ጸሓ ቦንቾይኔ ጫቆ ቃላይ፥ ዋጋይኔ ጸሓ ኬላ ዋጋ ሂደታይ ኢስታስ ኢሜቲዳስ።

5 ካሴ ኣዋቲካ ኢስታ ባጋ፤ ከርሰቶሲ ኢስታ ዜሬላ ዛርኬን ቆዴቲስ፤ ኢዚካ ኡባፌ ቦላ ጊዲዳ ሜርናስ ጋላቲቲዳ ጸሓ። ኣሚን።

6 ጊዶ ኣቲን ሄሳ ጉሲ ጸሓ ቃላይ ኣቲዳስ ጉስ ጊዳና፤ ኢስራኤሌፔ ዩሌቲዳይ ዉሪ ኢስራኤሌ ኣስ ጊዳና።

7 ኣብራሃሜፔ ዩሌቲዳይቲ ኢዛፔ ዩሌቲዳ ገሻስ ዉሪካ ኢዛ ናይታ ጊዳቴናሺን፥ «ኔ ዜሬላ ዩሳቃ ባጋራ ጳይጌታና» ጌቲቲዳ ማላ ሃኒዳስ።

8 ሄሳ ጉሲካ ጸሓ ና ጌቲቲዳይቲ ኢስቲ ኣሽን ዩሊዳይታ ጊዳቴና፤ ጊዶ ኣቲን ና ጊዳናይቲ ሂደታ ቃላን ዮቲቲ ኡቲዳይታ።

9 «ዪዛ ላይላ ሃኒ ዋዴ ታ ሃ ሰማና፤ ሳራይካ ኔስ ኣቲማ ና ዩላና» ጌቲቲዳ ኢዛስ ሂደታ ቃላይ ኢሜቲዳስ።

10 ሄሳ ጸላላካ ጊዳና፤ ኢርቢቃ ናይቲ ኢሳዴ ናኮ! ኢዚካ ኦ ኣዋ ዩሳቃ።

11 ሜንቲቲ ዩሌቲዳ ቡሮ ኢታ ዋይኮ ሎኦ ኦላንታ ዲሺን ጸሓ ቆፋይ ሚናና ማላ፥

12 ኦሶን ጊዶንታ ጳይጊዳይሳፌ ጊዲዳ ገሻስ፥ «ባይራይ ካሎዛስ ሃሬታና» ጌቲቲዳ ኢርቢቃስ ዮቲቲዳስ።

13 ሄሲካ፥ «ታ ያቆቤ ዶሳዲስ፤ ኤሳዌ ኢጸዲስ» ጌቲቲ ካሴ ጳፌቲዳ ማላ ሃኒዳስ።

14 ሂስቲን ኦ ሃኢ ኣይ ጊና? ጸሲ ቤሶንታ ኦጌራ ማዲ ኤሪዜ? ሙሌካ ማዲ ኤሬና።

15 ጸሲ ሙሴስ፥ «ታ ማራና ኮዪዳዴ ማራና፤ ታ ሚሼታና ኮዪዳዴስካ ሚሼታና» ጌስ።

16 ሄሳ ገሻስ ኣሲ ኮዪዳ ማላ ጊዶንታ ዋይኮ ኣሳ ዳቡራን ጊዶንታ ጸሲ ማሪዳ ማላ ሃኔስ።

17 ጌሻ ማጻፋይ ፓርኔ፥ «ታ ዋልቃይ ኔ ቦላ ቤታና ማላኔ ታ ሱንላ ቢታ ኡባ ቦላ ዮቲታና ማላ ታ ኔና ሃይሳስ ዴንፋዲስ» ጌስ።

18 ሄሳ ገሻስ ጸሲ ማራና ኮይዛዴ ማሬስ፤ ኢዛ ዋዚና ሙሚሳና ኮይዛዴ ዋዚና ሙሚሴስ።

19 እንጥፎ አሳዳይ፥ «ሂስቲን ሃኖይ ሄሳ ማላ ጊዲኮ ኑና ሃኖ ጋካናስ አዛስ ዋዪሲዜ? ጋሶይካ ኢዛ ሼኔ ዲጋና ዳንዳይዛይ ኦኔ?» ጋዳ ኔ ኦይቸንታ አጋካ።

20 ጊዶ አቲን ጸሳስ ዛሮ አሞስ ኔ ኦኔ? «ኦሴቲዳ ሚሽ ዛሪዲ ኦሊዳይሳ ኔ ታና አዛስ ሃይሳሉ ኦላዲ?» ጊ ኤሪዜ?

21 ኡርቃ ሜጲዛዳይ ሄ ኡርቃፌ ባጋ ቦንቸስ፥ ባጋ ቃሴ ጮ ሂራይሶ ኦሶስ ሜጲናስ ኢዛ ሼኔ ጊዳኔ?

22 ጸሲካ ባ ሃንቆ ቤሳናሲኔ ባ ዋልቃ ኤሪሳናስ ኮዪዲ ኢዛ ሃንቆ ቆንጨሲዛይታ፥ ጳያናስ ጊጌቲዳይታ ጳይሶንታ አጊኮቺ!

23 ኮይሮ ቦንቸስ ጊግሲዳ ኢዛ ማሮቴል ቤሲዛይታስ ኢዛ ቦንቸ ዱሬቴሊ ኤሬታና ማላ ኢዚ ኦላናሳ።

24 ጴይጊዳዳይ አይሁዳታ ባጋፌ ጸላላ ጊዶንታ አይዛቤታ ባጋፌ ጊዲዳ ኑናካ አሾንታ ጴይጊዳስ።

25 ሆሴኤ ማጸፋን፥ «ታ ዳሬ ጊዶንታይታ ታኒ፥

«ታ ዳሬታ» ጋ ጴይጋና፤

ታኒ ኢስታ ዶሴቶንታይታ፥

«ዶሴቲዳይታ» ጋ ጴይጋና።

26 ቃሴካ፥ «እንጥ ታ ዳሬ ዳኬታ»

ጌቲቲ ዮቴቲዳሶን፥

«ኢስቲ ዳኦ ጸሳ ናይታ»

ጌቲቲ ጴይጌታና።»

27 አሳያሲካ ኢስራኤሌ ናይታ ጊሻስ፥

«ኢስራኤሌ ናይታ ቆዳይ

አባ አጩ ማላ ዳሪኮካ

ጉላቲ ጸላላ አታና።

28 ጎዳይ ባ ፒርዳ ቢታ ቦላ

ኤሌ ፒርዳና» ጊ ዮቴዳስ።

29 ሄሲካ፥ «ዋጋ ጎዳይ

ኦስ ዜሬል አሾንታኮ

ኦኒካ ሶዶሜ

ካታማ ማላኔ

ጋሞራ ካታማ ማላ ጳያናሺን»

ጌቲቲዲ ካሴ አሳያሳ ዶናን ዮቴዳይሳ ማላ ሃኒዳስ።

ኢስራኤሌ ናይታኔ ሚሺራቾ ቃላ

30 ሂስቲን ኑ አይ ገኖ? አማኖን ቤተዳ ጸሎቴል ዴማናስ አይዛቤይ ዳቡርንታ ዴሚዴስ።

31 ገዶ አቲን ጸሎቴል ዋጋ ካሊዛ ኢስራኤል ናይቲ ዴሚቤቴና።

32 ሄሲ አዛስ ሄሳሉ ሃኒዴ? ኢስቲ አማኖን ገዶንታ ኦሶን ዴማና ካሊዳ ገሻሳ፤ ኢስቲካ ቆጶ ሹቻን ቆጶቲዳ።

33 ሄሲካ፤

«ሄኮ አስ ቆጶዛ ሹቶ

ኢስታ ኩንዲሲዛ ዛላ

ጸዮኔ ቦላ

ታ ዋላና፤

ኢዛን አማኒዛይይ ዬላቴና»

ጌቲቲዲ ካሴ ጌሻ ማጸፋን ጸፊቲዳይሳ ማላ ሃኒዴስ።

10

1 ታ ኢሻቶ! ኢስራኤል ናይታ ገሻስ ታ አሞይኔ ታ ጸስ ዋሲዛይ ኢስቲ ቆዮንታ አታናሳ።

2 ኢስቲ ጸሳ ዮኑስ ሚሼቲዛይታ ገዲዳይሳ ታ ኢስታ ገሻስ ማርካታና ዳንዳያይስ፤ ኢስታ ሚሼቴል ገዲኮ ኤራቴላን ገዴና።

3 ጸሲ አስ ጸሊሲዛ ኦጌ ኤርንታ ኣጊዲ ባ ጸሎቴል ኦጌ ካሊዳ አቲን ጸሳ ጸሎቴል ኦጌ ካሊቤቴና።

4 አማኒዛ አሳ ኡባ ጸሊሳናስ ኪርስቶሲ ዋጋ ኡባ ፖሊዴስ።

5 ሙሴይ ዋጋ ባጋራ ቤቲዛ ጸሎቴል ገሻስ ኤሪሲሼ፤ «ሃይታ ዋጋታ ፖሊ ኦሊዛይይ ሃ ዋጋታን ዳና» ገዛይሳ።

6 አማኖን ቤቲዛ ጸሎቴል ቃሴ፤ «ኔ ዋዚናራ ፑዴ ሳሎ ኦኔ ኬዛናይ? ጎፓ፤» ሄሳሉ ጉሲ ኪርስቶሳ ሳሎፔ ዱጌ ሃ ዋላና ጉሳ።

7 ዋይኮ፤ « (ዱጌ ጨማን ኦኔ ዋላናይ?) ጎፓ!» ሄሲካ ኪርስቶሳ ሃይቆፔ ቡሮ ዴንላና ጉሳ።

8 ገዶ አቲን ቃላይ አይ ገዜ? «ቃላይ ኔ አቻን ዴስ።» ኔ ዶናኒኔ ኔ ዋዚናን ዴስ፤ ኦኒ አማኖ ገሻስ ሳባኪዛ ቃላይ ሃይሳ።

9 ኔኒ ኔ ዶናራ፤ «ዬሱሲ ጎዳ» ጋዳ ማርካቲኮ ጸሲ ኢዛ ሃይቆፔ ዴንላዳይሳ ኔ ዋዚናን ኔ አማኒኮ አታና።

10 ኔኒ ጸሊናይ ዋዚናን አማኒኮ፤ ኔ አታናይ ኔ ዶናራ ማርካቲና።

11 ጌሻ ማጻፋይ ጊዛ ማላ፡ «ኢዛን አማኒዛይ ወሪካ ይላቱና።»

12 አይሁዳታ ጊደኒኔ አይዛቤታ ጊደን ዲማቴሊ ዴና፤ ኢሲ ጎዳይ ኡባሲካ ጎዳ፤ ኢዛ ዋሲዛይታ ጉጂ አንጄሰ።

13 «ጎዳ ሱንል ያይጊዛይቲ ወሪካ አታና» ጌቲቲ ጌሻ ማጻፋን ጸፊቲዴሰ።

14 ሂሰቲን ኢዛ አማኖንታይቲ ኢዛ ዋዝጊ ያይጋኔ? ቃሴ ኢዛ ጊሻሰ ሲዮንታ ዲሼ ዋሰቲ አማናኔ? ሳባኬይ ባይንዳ ዲሺን ዋሰቲ ሲያኔ?

15 ከቴቶንታ ዋሰቲ ሳባካንዴቶ? ሂሲካ፡ «ሚሺራቾ ቃላ ኤኪ ዪዛይታ ዩሲ አይ ማላ ሎኦ!» ጌቲቲ ጌሻ ማጻፋን ጸፊቲዳ ማላ ሂኒዴሰ።

16 ጊደ አቲን ሲዱዳይቲ ወሪካ ሚሺራቾ ቃላ ኤኪቤቴና፤ አሳያሲ፡ «ጎዳ! ኑ ዮቴዳይሳ ኦኒ አማኒዴ?» ጊዳ ማላ ሂኒዴሰ።

17 ሄሳ ጊሻሰ አማኖይ ቤቲዛይ ዮቴዛ ቃላ ሲዬላና፤ ዮቴቲዛ ቃላይካ ኪርሰቶሳ ጊሻሰ ዮቴዛ ቃላ።

18 ጊደ አቲን አሳይ ሲዩቤኔሻ? ጋዳ ታ ኦይቻይሰ፤ ቱማፔ አሳይ ሲዩዴሰ፤ ጌሻ ማጻፋን ጸፊቲዳ ማላ፡

«ኢሰታ ቃላይ ቢታ ኡባኒኔ
አላሜ ጋጸ ጋካናሰ ሲዬቲዴሰ።»

19 ታ ቃሴካ ኦይቻይሰ፤ ኢሰራኤሌ ናይቲ ቃላ ኤሪቤቴኔሻ?
ኮይሮ ሙሴይ ኢሰታሰ፡

«ታ ዴሬ ጊደንታይታን
ታ ኢሰታ አሞሳና፤
ዩሺ ቆፖንታ ዴሬታን
ታ ኢሰታ ዩሎቻና» ጊዴሰ።

20 ኢሳያሲካ ጸላቴላን፡
«ታና ኮዮንታይታሰ ታ ቤታዲሲ፤
ታና ኦይቾንታይታሰ
ታና ቆንጪሳዲሰ» ጊዴሰ።

21 ኢሰራኤሌ ጊሻሰ ቃሴ፡
«ታሰ አዛዜቶንታ ዴሬኮኔ
ታሰ ኤኖ ጎንታ ዴሬኮ

ኩሜላ ጋላሰ
ታ ኩሼ ሚጫዲሰ» ጌሰ።

11

ጸሲ ኢሰራኤል አሳ ሙሌ ዩጊ አጊቤና

¹ ሂሰቲን ጸሲ ባ ዳሬታ ዩጊ አጊዴ? ጋዳ ታ ኦይቻይሰ፤ ሙሌካ አጊቤና፤ ታኒካ ታ ባጋራ ቢኒያሜ ዛርኬ፥ ኣብራሃሚ ዜሬላ ጊዲዳ ኢሰራኤል አሳ።

² ጸሲ ኮይሮፔ ባ ኤሪዳ ዳሬዛ ዩጊቤና፤ ኤላሲ ኢሰራኤል ናይታ ቦላ ሞቶ ጸሳኮ ዋስቲ ሺሺዳኮ ጌሻ ማጻፋይ ኢዛ ጊሻሰ ኣይ ጊዛኮ ኢንቲ ኤሬኬቲ?

³ «ጎዶ! ኢስቲ ኔ ናቤታ ዋጂዳ፤ ኔሰ ያርሺዛሶሆታካ ላሊዳ፤ ቃሴ ታኒ ታርካ ኣታዲሰ፤ ታናካ ዋጃና ጌቲሰ» ጊዴሰ።

⁴ ጸሲ ኢዛሰ፡ «ባኣሌ ጌቲቲዛ ኤቃሰ ጎይኖንታይታ ላፑን ሺ ኣሰ ታኒ ታሰ ኣሻዲሰ» ጊ ዛሬዴሰ

⁵ ሂሳ ማላካ ሃኢ ሃ ዋዴዛንካ ጸሳ ኪያቴላን ኢሰራኤል አሳፔ ዶሬቲ ኣቲዳ ጉላቲ ዴቲሰ።

⁶ ሂሰቲን ሄሲ ጸሳ ኪያቴላን ኣቲን አሳ ኦሶን ጊዴና፤ አሳ ኦሶን ጊዲዳኮ ጸሳ ኪያቴላ ኪያቴላ ጊዴና።

⁷ ሂሰቲን ኣይ ጋኔ? ኢሰራኤል ናይቲ ሎኤላ ኮዬዳይሳ ዴሚቤቴና፤ ጸሳን ዶሬቲዳይቲ ጊዲኮ ዴሚዳ፤ ሃንኮ ኣቲዳይታ ዋዚናይ ሙሚዴሰ።

⁸ ካሴ፡ «ኢሰታ ኣይፌይ ጸሎንታ ማላ፡ ኢሰታ ሃይላይካ ሲዮንታ ማላ ጸሲ ሃኖ ጋካናሰ ኢሰታሰ ዶጨሲዛ ኣያና ኢሚዴሰ» ጌቲቲ ጌሻ ማጻፋን ጸፌቲዳ ማላ።

⁹ ዳዊቲካ፡ «ኢሰታ ማዳይ
ኢሰታ ኦይኪዛ ናርጸኔ ያርዴ፤
ኢሰታሰ ቆጲዛዚኔ
ቂጻቴ ጊዶ።

¹⁰ ኢሰታ ኣይፌይ ጸሎፎ፤ ጎዜቶ፤
ኢሰታ ዞኮይ
ሜርናሰ ኩኖ» ጊዴሰ።

ኣይዛቤታ ኣቴላ

11 እኔ ቃሴ ታ ዛራ ኦይቻይሰ፤ ኢሰራኤል አሳይ ኩንዳላፊ ናምእንዳ ዳንዴ፤ ዳንዳና፡ ሃራፔካ ኢሰራኤል ናይታ ቃናቲሳና ገሻሰ ኢሰታ ሞሮ ጋሶን አቶቴሉ ኣይዛቤታስ ጋኪዳስ፡፡

12 ገደ አቲን ቃሴ ኢሰታ ሞሮይ ኣይዛቤታስ ኣንጅ ገዲዳስ፡፡ ኢሰታ ኩንዳሉካ ቃሴ ኣይዛቤታስ ኣንጅ ገዲኦ ኢሰቲ ሲሚ አቲዳኦ ኣይ ማላ ገታ ኣንጅ ገዲንዳሺን!

13 ኣይዛቤቶ! ታ ኢንቴስ ዮታይሰ፤ ታ ኣይዛቤታስ ኪቴቲዳዴ ገዲዳ ገሻሰ ታ ኦሶዛ ሚና ፖላና፡፡

14 ሄሲካ ታ ባጋ አሳቲ አሞሳና ማላ ዳንፊዳዳ ኢሰታፊ ጉላ አሳታ አሻናሰ ኡፋይሰ ኦላይሰ፡፡

15 ጸሲ ኢሰታ ኣገዳ ኣይዛቤቲ ጸሳራ ገጊኦ ጸሲ ኢሰራኤል ናይታ ዛሪዲ ኤኪዛ ዋዴ ኢንቴስ ኣዚ ሃናና ሚሳቲዜ? ሄሳ ጉሲ፡ «ሃይቆፔ ዳንዲዳስ» ጉሳ ማላ፡፡

16 ኮይሮ ቡኬሶይ ሎኦ ገዲኦ ሃንኮ ኢዛፔ ኦሴቲዛይሲ ዉሪካ ሎኦ ገዴስ፤ ሄሳፊካ ኢሲ ሚላ ጸጸይ ሎኦ ገዲኦ ሃንኮ ኢዛ ቦላ ዲዛ ሃጋቲካ ሎኦ ገዴቴስ፡፡

17 ኬላ ማጉን ዲዛ ዋጋራ ሚላ ሃጋታ ማላቲ ኢንቴ ሜቂ ዋዲን ሃንኮ ዋራን ዲዛ ዋጋራ ሚላታ ሚሳቲዛ ኣይዛቤቲ ኢንቴ ኪቾሳን ገዲዲ ኢንቴ ሃሮኔ ኢንቴ ኣንጅ ሻኪ ኤኪዛዴንታ ገዲኦ፡፡

18 ሄይታ ሄ ሜቂ ዋዲዳ ሃጋታ ቦላ ኦቶሬቶፋ፤ ኢንቴ ኢሰታ ቦላ ኦቶሬቲኮ ቃሴ ሃኖ ዋዚናን ዋሊቴ፤ ሄ ሚላ ቶኪዳይ ኔና ገዲካ፤ ሚላይ ኔና ቶኪዳስ አቲን፡፡

19 ሂሰቲኮ፡ «ሄ ሃጋቲ ሜቂ ዋዲዳይ ኦኒ ኢሰቲ ኪቾሳን ጌላና ማላሳ» ጎንታ ኣጌኬታ፡፡

20 ቱሙ ገዴታሺን ኢሰቲ ሜቂዳይ ኣማኖ ፓጩፔ ዳንዲዳይሳና፡፡ ኢንቴ ቃሴ ኣማኖን ኤቂዴታ፤ ባቢቴ አቲን ኦቶሬቶፍቴ፡፡

21 ጸሲ ኮይሮፔ ዲዛ ሃጋታስ ሚሼቶንታዴ ገዲኦ ኢንቴስካ ሚሼቴና፡፡

22 ሄሳ ገሻሰ ጸሳ ኪያቴሉኔ ኢዛ ሜንጼ ኢታቴላ ኣኔ ጸላ፤ ኢዛ ሜንጼ ኢታቴሉ ኩንዲዳይታ ቦላ፤ ኢዛ ኪያቴሉ ቃሴ ኢንቴ ኢዛ ቃዴቴላ ጋርሳን ዲዛ ዋዴ ጋካናሰ ጸላላ፤ ሄሲ ባይንዳ ኣጊኦ ኢንቴካ ቃንጾታና፡፡

23 ኢሰቲ ኣማኖንታ ሚኒ ኤቂዳሶፔ ሲሚኮ ካሴ ባ ዲዛሶ ሲሚ ጌላና፤ ጸሲካ ኢሰታ ዛርሲ ጌልላና ዳንዳዬስ፡፡

24 ኢንቴ ባዞ ዋጋራ ሚላፊ ቃንጾቲ ካሴ ኢንቴ ሜዴቲላፊ ገደንታ ሎኦ ሚላን ኢንቴ ጌላና ዳንዳይኮ ኮይሮፔ ባ ሜዴቲላ

ሃጋታ ጊዲዳይቲ ሄይቲ ካሴ ኢዛ ቦላ ዲዛ ዋጋራ ሚላን ሲሚ ጌሎይ ኢሰታሰ ዋኒ ሃኔኔ?

ኢሰራኤል ኣሳሰ ጸሳ ማርቴል

25 ታ አሻቶ! ኢንቴ ጨንጫ ኣሰ ጊዲዳይሳ ኢንቴሰ ሚሳቶንታ ማላ ሃይሳ ጊዶ ጹራ ዮኦዛ ኢንቴ ኤርንታ ኣታና ማላ ታ ኮይኬ። ሄሲካ ኣይዛቤታፔ ጴይጌቲዳይቲ ዉሪ ኣማናና ጋካናሰ ኢሰራኤል ናይታ ዋዚናይ ሙሚዴሰ።

26 ሄሳ ጊሻሰ ኢሰራኤል ናይቲ ዉሪካ ኣታና። «ኣሺዛዴይ ጸዮኔፔ ያና፤ ያቆቤፔካ ኢታቴል ዲጋና።

27 ታኒ ኢሰታ ናጋራ ዉርሳ ቆይሲዳፔ ጉዬ ታ ኢሰታራ ጫቆን ጌሊዛ ቃላይ ሄሳ» ጌቲቲዲ ካሴ ጌሻ ማጻፋን ጸፊቲዳ ማላ ሃኒዴሰ።

28 ኢንቴሰ ኣይዛቤታሰ ሚሺራቾ ቃላይ ጋካና ማላ ኢሰራኤል ናይቲ ጸሳን ኢጴቲዳ ኣሰ ጊዲዳይ፤ ጊዲኮካ ካሴ ዶርዛ ማላ ጊዲኮ ባ ኣዋታ ባጋራ ኢሰቲ ዶሴቲዳይታ።

29 ጸሲ ዶሪዳፔኔ ባ ኪያቴል ኢሚዳፔ ጉዬ ባ ኦሊዳ ሚሻን ሲሚዲ ዋቋቴና።

30 ኢንቴካ ካሴ ኣዛዜቶንታይታኮ! ኢሰቲ ኣዛዜቶንታ ኢጲን ሃኢ ኢንቴና ማሪዳይሳ፤

31 ጸሲ ኢንቴና ማሪዳ ጋሶን ኢሰቲካ ማሬታና ማላ ሃኢ ኣዛዜቶንታይታ ጊዲዳ።

32 ጸሲ ዉርሲካ ማራናሰ ኣሲ ዉሪካ ኣዛዜቶንታ ማላ ጎርዲዴሰ።

ጸሳሰ ሺቂዳ ሳባ

33 ጸሳ ዲሬቴሊ፥ ኣቶ ኤራቴላይኔ ኢዛ ኤራቴላይ ኣይ ማላ ጨማ! ኢዛ ፒርዳይ ኣይ ማላኮ ፓጩቴና፤ ኢዚ ኣጲዳ ጌዶይካ ኤሬቴና።

34 «ጎዳ ዋዚና ኤሪዳይ ኦኔ? ኢዛሰ ዞሬ ኢሚዳይ ኦኔ?

35 ጸሲ ዛሪ ኢማና ማላ ኢዛሰ ታልኤ ኢሚዳይ ኦኔ?» ጌቲቲ ጸፊቲዳ ማላ።

36 ዉሪካ ኢዛፔ፥ ኢዛን፥ ኢዛሳ፤ ኢዛሰ ቦንቾይ ሚርናፔ ሚርናሰ ጊዶ! ኣሚን።

12

ጸሳስ ቤሲዛ ዴኦ ያርሾ

¹ ሄሳ ገሻሰ ታ አሻቶ! ኢንቴ አሳቴላ ጌሺኔ ጸሰ ኡፋይሲዛ ዴኦ ያርሾ ኦሊዲ ኢንቴ ሸሻና ማላ ታ ኢንቴና ጸሳ ቃጴታን ዋሳይሰ፤ ሄሲካ ዋዚናማ አሳ ማላ ኢንቴ ጸሳስ ኦሊዛ ኦሶ።

² ሎኦ፡ ኡፋይሲዛዚኔ ኩሜላ ጊዲዳ ጸሳ ሸኔይ አዛኮ ኢንቴ ፓፌ ኤራና ማላ ኢንቴ ቆፋን ኦራጺዲ ላሜቲቴ ኣቲን ሃይሳ አላሜ አሳ ሚሳቶፒቴ።

³ ኢንቴሰ ጸሲ አሚዳ አማኖ ማላ ኢንቴርካ ኢንቴና ፓፌ ጸሊቴ ኣቲን ሃኢ ዲዛይሳፌ ቦላራ ኢንቴና ቶቂሲ ጸሎንታ ማላ ታኒ ታሰ አሚቲዳ ጸሳ ኪያቴላን ኢንቴና ኢሳ ኢሳ ዘራይሰ።

⁴ ኑፔ ኢሲ ኢሲ አሳሰ ኢሲ አሳቴላ ቦላ ዳሮ ቢሊቴቲ ዲዛ ማላ ሄይቲካ ሄ ቢሊቴቲ ኢሲ ማላ ኦሶ ኦሶንታይሳ፡

⁵ ሄሳላካ ኑኒ ዳርታ ጊዲ ኡቲዲ ኪርሰቶሳን ኢሲ አሾ፤ ኑኒ ኢሶይ አሳሰ አሾ።

⁶ ኑሰ አሚቲዳ አሞታ ማላ ዲማ ዲማ አሞታይ ዴሰ፤ ኢሳዴሰ ቡርፔ ሃናናዝ ዮቶ ጊዲኮ ኢዛዴሰ አሚቲዳ አማኖ ማላ ዮቶ።

⁷ ኦሊ ማዲዛዴይ ኦሊ ማዶ፤ ታማርሲዛዴይካ ታማርሶ።

⁸ ዘሪዛዴይ ጊዲኮ ዘር፤ ባይንዳይታሰ አሚዛዴይ ጉጂ አሞ፤ አይሲዛዴይ ሚኒ አይሶ፤ ማሪዛዴይካ ኡፋይሳን ማር።

ሲቆ

⁹ ኢንቴ ሲቆቴሊ ቆጴፔ ቆሞን ጊዶፖ፤ ኢታ ጊዲዳይሳ ወርሲካ ኢጺቴ። ሎኦ ጊዲዳይሳራ ኢሲፌ ኦይኬቴቴ።

¹⁰ ኢንቴ ኢንቴ ጋርሳን ኢሶይ አሳራ አሻታ ማላ ሎኦሊ ሲቁቴቴ፤ ኢሶይ አሳ ባፔ ኣሊ ቦንቸዛይታ ጊዲቴ።

¹¹ ጎዳሰ ኦላና አያናን ጽጌቲዛይታ ጊዲቴ ኣቲን ሄሳ ሄ ሚኖቴላፌ ጉዬ ጎፒቴ።

¹² ሂዶታን ኡፋዬቲዛይታ ጊዲቴ፤ ሜቶ ዳንዳይቴ፤ ዋሳን ሚኒቴ።

¹³ አማኒሼ ዋዬቲዛይታሰ ኢንቴሰ ዲዛይሳፌ ሻኪ አሚቴ፤ አሞላ ሞኪቴ።

¹⁴ ኢንቴና ቃንጊዛይታ አንጃቴ ኣቲን ቃንጎፍቴ።

¹⁵ ኡፋዬቲዛይታራ ኡፋዬቲቴ፤ ሙዘቲዛይታራ ሙዘቲቴ።

¹⁶ ኢንቴ ኢንቴ ጋርሳን ዶሴቴላን ዲቴ፤ ማንቆታራ ኢሲፌቴላን ዳናሰ ኮዪቴ ኣቲን ኦቶሬቶፍቴኔ ጨቁቶፍቴ።

17 ኦናሰካ ኢታ ገሻሰ ኢታ ዛርፒቴ፤ አሰ ኡባ ኣቻን ሎኦ ሚሽ ኦፋናሰ ሚኒቴ።

18 ኢንቴሰ ዳንዳዬቲኮ ኢንቴ ኢንቴ ባጋራ አሰ ኡባራ ሳርን ዲቴ።

19 ታ ሲቆቶ! ኢንቴ ሃሎ ጸሲ ኬሶ ኣቲን ኢንቴርካ ሃሎ ኬሶፍቴ። «ሃሎ ኬሳናይ ታና ጌሰ ጎዳይ» ጌቴቲ ጌሻ ማጸፋን ጸፊቲዴሰ።

20 ሃሎ ኬሳና፤ «ኔኒ ኔ ሞርኬይ ጋፊኮ ሚዛ፤ ኢዚ ሳሜቲኮ ኡሻ፤ ኔ ሂሳሶ ኦሊኮ ታማ ቦንቆ ኢዛ ቦላ ኮራሳ» ጌቴቲዲ ጌሻ ማጸፋን ጸፊቲዴሰ።

21 ኢታ ሎኦ ኦሶን ጸና ኣቲን ኢታን ጸኔቶፋ።

13

ዴሬ ኣይሲዛይታሰ ኣዛዜቴሰ

1 ኣይ ኣሲካ ባና ኣይሲዛ ዳናታሰ ሃሬታናሰ ቤሴሰ፤ ጸሳፊ ኢሜቶንታ ዲሺን ዳናቴሊ ዴና፤ ሃኢ ዲዛ ዳናቲ ጸሳፊ ዳናቲዳይታ።

2 ሄሳ ገሻሰ ዳና ቦላ ማካሊዳይ ጸሳ ዋጋ ቦላ ማካሌሰ። ሄ ማካሊዛይቲካ ባ ቦላ ፒርዳ ኤሄቴሰ።

3 ዴሬ ኣይሲዛይቲ ኢታ ኦሊዛይታ ባቢሴቴሰ ኣቲን ሎኦ ኦሊዛይታ ባቢሴቴና። ኔኒ ዴሬ ኣይሲዛዴሰ ባቦንታ ኣጋና ኮያይ? ሂሰቲኮ ሎኦ ኦፋ፤ ኢዚካ ኔና ጋላታና።

4 ኢዚ ኔሰ ሎኦ ኦፋናሰ ጸሳ ኦሳንቻ፤ ጊዶ ኣቲን ኔ ኢታ ኦሊዳ ጊዲኮ ኢዛሰ ባባ፤ ጋሶይካ ኢዚ ማሻ ጮ ሜላ ጊጺቤና፤ ኢዚ ኢታ ኦሊዛዴ ቃጸያናሰ ጸሳ ኦሳንቻ።

5 ሄሳ ገሻሰ ኢዛ ቂጸቴሰ ባቦ ጸላላ ጊዶንታ ኔ ቆፋንካ ዳናቲዛዴሰ ኣዛዜታናሰ ቤሴሰ።

6 ኢንቴ ጊራ ኢሚዛይ ሄሳሳ፤ ኣይሲዛይታ ሄ ኦሶዛ ቦላ ጸሲ ዋሊዴሰ።

7 ኢሰታፊ ኢሳሰ ኢሳሰ ቤሲዛይሳ ኢሚቴ፤ ጊራ ኢማና ቤሲዛይታሰ ጊራ ኢሚቴ፤ ቃራጸ ቃንጸናሰ ቤሲዛይታሰ ቃራጸ ቃንጸቴ፤ ባባናሰ ቤሲዛይታሰ ባቢቴ፤ ቦንቻናሰ ቤሲዛይታ ቦንቹቴ።

ኢሶይ ኢሳራ ሲቄቴሰ

8 ኢንቴ ጋርሳን ኢሶይ ኢሳራ ሲቄቴፋፌ ኣቲን ኦና ቦላካ ኣጮይ ደፖ፤ ኣሰ ሲቄዛ ኣሲ ኢዚ ዋጋ ፖሊደሰ።

9 «ለይማቶፓ፤ ዋጵፓ፤ ኣሞቶፋ» ገዛይቲኔ ሃራ ኣዛዞቲ ዲኮካ፡ «ኣሰ ኡባካ ኔ ማላ ሲቃ» ገዛ ሃኖ ኢሲ ዋጋይን ወሪካ ኩዬቲደሰ።

10 ሲቆይ ኣሳ ቦላ ኢታ ኦፊና፤ ሄሳ ገሻሰ ሲቆይ ዋጋ ኡባሰ ኩሻ።

11 ሃይሳ ዋዴዛ ጫዲ ጼሊዲ ሄሳ ኦፊቴ፤ ሃኢ ሃና ኢንቴ ጲሰቦፌ ዴንዲዛ ዋዴ፤ ኦ ካሴ ኣማኖሶፌ ሃ ሲሚን ሃኢ ኦሰ ኣቲዛ ዋዴይ ማቲደሰ።

12 ቃማይ ኣጲን ዋንታና ጌሰ፤ ሄሳ ገሻሰ ኣኔ ኦ ቋማ ኦሶ ዋራ ዩጊዲ ፖኦ ኦላ ሚሽ ማይኦሰ።

13 ጋላሳራ ሄሚቲዛ ማላ ኣኔ ዋጋራ ሄሚቶሰ፤ ማጉልሳኒኔ ማፉን ጊደፖ፤ ላይማ ኣሞኒኔ ላይማን ጊደፖ፤ ቃናቴቴላኒኔ ፓላማን ጊደፖ።

14 ሄሳ ኣጊዲ ዬሱሰ ኪርሰቶሳ ማይኢቴ፤ ኣሾ ኣሞ ፖላናሰ ቆፖፍቴ።

14

ኣሳ ቦላ ፒርዶፋ

1 ኢንቴ ጋርሳን ኣማኖን ቡሮ ሚኖንታዴ ሺሺ ኤኪቴ ኣቲን ኢዛ ቆፋ ቦላ ፒርዶፍቴ።

2 ኢሲ ኢሲ ኣሲ ቤቲዳይሳ ወርሲ ማናሰ ኣማኖይ ዴሰ፤ ቃሴ ኣማኖን ሚኖንታዴይ ኣታኪልቴ ጸላላ ሜሰ።

3 ቤቲዳይሳ ኡባ ሚዛዴይ ወርሲ ሞንታዴ ካጵፓ፤ ሞንታዴይ ቃሴ ሚዛዴ ቦላ ፒርዶፎ፤ ጸሲ ኡባካ ኤኪደሰ።

4 ሃንኮ ኦፊዛዴ ቦላ ፒርዲዛዴይ ኔ ኦኔ? ኢዛዴይ ኩንዲኮ ዋይኮ ኤቄኮካ ጎዳሳ፤ ጎዳይ ኢዛ ኤሳናሰ ዳንዳይዛ ገሻሰ ኢዚ ኤቃንደሰ።

5 ኢሳዴይ፡ «ጋላሳታፔ ኢሲ ጋላሰ ሃራ ጋላሳፌ ኣፊዲ ባሰ ዲማ ጋላሰ» ጊ ቆፔሰ፤ ሃራ ኣሲ ቃሴ፡ «ጋላሳቲ ወሪካ ኢሲ ገና» ጊ ቆፔሰ። ኢሲ ኢሲ ኣሲ ባ ዋዚናን ኣሚኒዳ ማላ ኦሞ።

6 ኢሲ ጋላሰ ሃራ ጋላሳፌ ዲማሲ ቆፒዛዴይ ኢዚ ሄሳ ኦፊዛይ ጎዳ ቦንሻሰ ጊዲኮ ሚዛዴይካ ጎዳ ቦንሻሰ ጊዲ ሜሰ። ሂሰቲዲ ጸሰ ጋላቴሰ። ሞንታዴይካ ጎዳ ቦንሻሰ ጊዲ ሙሰ ኣጌሲኔ ጸሳሰ ጋላታ ኢሜሰ።

7 ኑፕ ኦኒካ ባስ ዲዛዴይ ባፔ ባስ ሃይቁዛዴይ ዴና።

8 ኑ ዲኮካ ጎዳስ ዶስ፤ ሃይቁኮካ ጎዳስ ሃይቆስ፤ ሄሳ ጊሻስ ዲኮካ ዋይኮ ሃይቁኮ ኑኒ ጎዳሳ።

9 ሄሳ ጊሻስ ሃይቁዴይታሲኔ ፓጻ ዲዛይታስ ጎዳ ጊዳናስ ኪርሰቶሲ ሃይቁዲ ሃይቆፔ ፓጻ ዴንዲዴስ።

10 ሂሰቲን ኔ ኣዛስ ኔ ኢሻ ቦላ ፒርዳይ? ኣዛስ ኔ ኢሻ ሌቃይ? ኑ ወሪካ ጸሳ ፒርዳ ዋምቦራ ሲንሐ ሺቃና ዶስ።

11 «ታ ፓጻ ዳይስ፤

ጉልባቴይ ወሪካ ታስ ጉልባታና።

ኢንጸርሲ ወሪ

ጸሳስ ማርካታና»

ጌቴቲ ካሴ ጌሻ ማጻፋን ጸፌቲዴስ።

12 ሄሳ ጊሻስ ኑኒ ኢሲ ኢሲ ኣሲ ጸሳ ሲንሐ ሺቁዲ ኑ ኦሶ ጊሻስ ኢዛስ ዛሮ ኢማና።

13 ሄሳ ጊሻስ ኑኒ ኑ ጋርሳን ኢሶይ ኢሳ ቦላ ፒርዳናፔ ኣኔ ናጌቶስ፤ ሄሳ ኣጊዲ ኑ ኢሻስ ቆጶ ጊዲዛይሳ ዋይኮ ኢዛ ኦይኪዛ ናርጸ ዋሶንታ ማላ ኣኔ ኑ ናጌቶስ።

14 ታኒ ጎዳ ዬሱሳን ኣማናዳ ሚዛ ካፋን ቱናይ ባይንዳይሳ ኤራዲስ፤ ጊዶ ኣቲን ኢሳዴይ ኢሲ ሚሽ ቱና ጊ ቆፒኮ ሄ ሚሻይ ኢዛዴስ ቱና።

15 ኔኒ ኔ ኢሻስ ሚዛ ካፋ ጋሶን ቆጶ ጊዲኮ ሲቆን ሲሜሬታቤካ፤ ኪርሰቶሲ ኢዛ ጊሻስ ሃይቁዳ ኔ ኢሻ ኔ ሚዛ ካፋ ጋሶን ዋጶፓ።

16 ኢንቴ ሎኦ ጊዲ ቆፒዛ ሚሺ ኢታ ጌቴታና ማላ ኦሶፍቴ።

17 ጸሳ ካዋቴሌ ጸሎ ኣያናን ቤቲዳ ጸሎቴሐ፤ ሳሮቴሌኔ ኡፋይሳፌ ኣቲን ሙሳ ዮኦኔ ኡሻ ዮኦ ጊዴና።

18 ሃይሳሶ ኪርሰቶሳስ ኦሌዛዴይ ጸስ ኡፋይሴሲኔ ኣሳ ኣቻንካ ጋላቴሰ።

19 ሄሳ ጊሻስ ሳሮቴሌ ቤቲዛ ኦጌኔ ኑኒ ኑ ጋርሳን ሎኣናስ ቤሲዛ ኦጌ ኣኔ ኮዮስ።

20 ኑኒ ሚዛ ካፋ ጋሶን ጸሳ ኦሶ ኣኔ ሞርኮ፤ ካሌ ወሪካ ጌሻ፤ ጊዶ ኣቲን ሃራ ኣሳስ ቆጶ ጊዲዛ ካሐ ሙሲ ባላ ኦሶ።

21 ኔ ኢሻስ ቆጶ ጊዲዛዝ ጊዲኮ ኣሻካ ማናፔኔ ዋይኔ ጫጃ ኡያናፔ ዋይኮ ኣይ ሚሺካ ኔ ኦሶንታ ኣጊኮ ሎኦ።

22 ሄሳ ገሻሰ ሃይታንታ ሚሳቲዛ ሚሻታሰ ኔሰ ዲዛ አማኖይ ኔ ጊደኒኔ ጸሳ ጊደን ዴኔ። «ሃይሲ ሊኬኮ» ጊዲ አማኖን ኤኪዳ ሚሻን ባርካ ባ ቦላ ፒርዶንታዴይ ኢዛዴይ እንጃቲዳዴ።

23 ጊደ ኣቲን ዎዚናራ ሲጲሼ ሚኮ ኢዚ አማኖን ሞንታ ገሻሰ ኢዛ ቦላ ፒርዴቲዴሰ፤ አማኖን ኦፋንታዚ ዉሪካ ናጋራ።

15

1 ኑኒ አማኖን ሚኒዳይቲ ሃንኮ አማኖን ሚኖንታይታ ሜቶ ቶካናሰ ቤሰሰ ኣቲን ኑ ጸላ ኡፋዬቲዛይታ ጊዳናሰ ቤሰና።

2 ኑኒ ዉሪካ ሃራ ኣሲ ባ አማኖን ሚናና ማላ ኢዛ ጎኢዛዚኔ ኡፋይሲዛ ሚሽ ኣኔ ኦሶሰ።

3 ኪርሰቶሲ ባና ኡፋይሲቤና፤ ሃራፔካ፡ «ኣሳይ ኔና ጫዩዳ ጫሻይ ታና ጋኪዴሰ» ጌቲቲ ካሴ ጌሻ ማጻፋን ጸፊቲዳይሲ ፖሌቲዴሰ።

4 ኑኒ ጌሻ ማጻፋታፔ ዴሚዛ ዳንዳያይኔ ሚኖቴላ ኑሰ ዳና ማላ ኮይሮፔ ጸፊቲዳይሲ ዉሪካ ኑ ኢዛፔ ኑሰ ቲሚርቴ ዴማና ማላ ጸፊቲዴሰ።

5 ሚኖቴላኔ ዳንዳያ ኢሚዛ ጸሲ ኢንቴ ዬሱሰ ኪርሰቶሳ ካሊሺን ኢንቴሰ ኢንቴ ጊደን ኣያና ኢሲፊቴላ ኢሞ።

6 ሄሲካ ኢንቴ ኢሲ ዎዚናኒኔ ኢሲ ዶና ጊዲዲ ኑ ጎዳ ዬሱሰ ኪርሰቶሳ ኣዎ ጸሳ ቦንቻናሳ።

አማኖንታ ዴሬታሰ ሳባኬቲዳ ሚሺራቾ ቃላ

7 ሄሳ ገሻሰ ጸሲ ኢንቴና ጸሳ ቦንቾን ሞኪ ኤኪዳ ማላ ኢንቴካ ኢሶይ ኢሳ ኡፋይሳን ሞኪ ኤኪቴ።

8 ካሴ ኣዋታሰ ኢሜቲዳ ሂዶታ ቃላ ፖላናሰ ጸሳ ቱማቴላ ኤሬታና ማላ ኪርሰቶሲ ኣይሁዳታሰ ኦሊዛዴ ጊዲዳይሳ ታ ኢንቴሰ ዮታይሰ።

9 ሃሳፋካ ኣይዛቤቲ ኢዛ ማሮቴላ ገሻሰ ጸሰ ጋላታና ማላ፤ ሄሲካ፡

«ታ ኔና ዴሬ ጊደን ጋላታና፤

ኔ ሱንሳሰካ

ጋላታ ማዛሙራ ዬጻና»

ጌቲቲ ጌሻ ማጻፋን ጸፊቲዳ ማላ።

10 ቃሴካ፡ «ኣይዛቤቶ!

ኢንቴካ ጸሳ

ዴሬታራ ኡፋዬቲቴ»

ጌቴቲ ጌሻ ማጻፋን ጸፌቲዳስ።

11 ናሞኣን፡ «ኣይዛቤቲ
ኢንቲ ወሪካ ጎዳ ጋላቲቲ፤
ዴሬይ ወሪ ኢዛ ሳቢቲ»

ጌቴቲ ጌሻ ማጻፋን ጸፌቲዳስ።

12 ሄሳሶ ኢሳያሳን፡

«ባ ዴሬ ኣሳ ቦላ
ካዎቲዛ ኢሴዬ ናይ ያና።
ኣላሜ ኣሳ ኣይሲዛዴይ ዴንዳና፤
ኢስቲካ ኢዛን ኡፋዬታና» ጌሰ።

13 ኢንቲ ኢዛን ኣማኒዛ ጌሻስ ሂደታ ጸሲ ኢንቴናን ኡፋይሲኔ
ሳርቴል ኩን፡ ሄሲካ ጸሎ ኣያና ዎልቃ ሂደታይ ኢንቴስ ዳራናሳ።

ኣይዛቤታ ኦሳንቻ ጸወሎሳ

14 ታ ኢሻቶ! ኢንቲ ሎኤቴላን፡ ኤራቴል ኡባን ኩሚዳይታኔ
ሃራታ ዞራናስ ኤራይ ዲዛይታ ጌዲዳይሳ ታ ኣዳፌ ሻካ
ኤራዲስ።

15 ታ ጸሳፌ ኤኪዳ ኢሞታ ገና ቃሴካ ኢንቴና ቆፍሳናስ ኢሲ
ኢሲ ዮኦታ ጸላቴላን ኢንቴስ ጸፋዲስ።

16 ሄሳ ሄ ኪያቴል ኢሜቲዳይ ታኒ ጸሳ ሚሺራቾ ቃላ ሃንኮ
ዴሬታስ ዮታና ማላሳ፤ ቃሴካ ቄሴ ማላ ጌዲዳ ዬሱስ ኪርሰቶሳስ
ኦፋናሳ፤ ሄሳ ጌሻስ ሃንኮ ዴሬ ኣሳይ ጸሎ ኣያናን ዲማቲዲ ጸስ
ኡፋይሲዛ ያርሾ ጌዲዲ ሺቃና ማላ ኦላይስ።

17 ሄሳ ታኒ ጸሳስ ኦፊዛ ጌሻስ ዬሱስ ኪርሰቶሳን ጨቄታይስ።

18 ታ ዮቲዳይሳኒኔ ታ ኦፊዳይሳን ሃንኮ ዴሬ ኣሳይ ጸሳስ
ኣዛዜታና ማላ ኪርሰቶሲ ታናን ጌዲዲ ኦፊዳዛፔ ኣቲን ሃራ
ሃሳያና ጸሊኬ።

19 ሄሲካ ሃኒዳይ ጸሎ ኣያና ዎልቃን ማላታታ ባጋራ ሃኒዴስ፤
ሄሳ ማላንካ ዬራሳላሜፔ ኢልዋቆሬ ጋካናስ ታ ኪርሰቶሳ
ሚሺራቾ ቃላ ሳባካዲስ።

20 ሃራ ኣሲ ካሴ ኦፊዳሶን ታ ጌሎንታ ማላ ጋዳ ካሴ
ኪርሰቶሳ ሱንፊ ጸይጌቲ ኤሮንታሶን ሚሺራቾ ቃላ ሳባካናይሲ
ታስ ኣሞ።

21 ሃራፔካ፡

«ኢዛ ጌሻስ ኢስታስ ዮቴቶንታይቲ
ኢዛ ቤያና፤

ሲዬ ኤርንታይቲ አኬካና»
 ጌቲቲ ካሴ ጌሻ ማጻፋን ጸፊቲዳ ማላ ሃኒዴስ።
 22 ሄሳ ጋሶን ታ ኢንቴኮ ቦንታ ማላ ዳሮ ዋዴ ዲጌታዲስ።

ኦሮሜ ቤያናስ ጳውሎሳ ጊጌቴል

23 ሃኢ ቃሴ ታስ ሃን ኦሶይ ባይንዳ ጊሻስ ዳሮ ላይላታፔ ሃ ሲሚን ኢንቴና ቤያናስ ታ ዳሮ ላሞታዲስ።

24 ሃይሳ ታ ቆፋ ታኒ ኢስፔኔ ቢዛ ዋዴ ፖላናስ ቆፓይስ፤ ሄራ ኣቆሼ ኢንቴና ቤያናሲኔ ኢንቴናራ ጉላ ዋዴ ጋሞኣዳ ላሞታ ኣሉዳ ማላ ኢንቴ ታና ማዳና ጋዳ ሂዶታ ኦላይስ።

25 ሃኢ ቃሴ ኣማኒዛይታስ ኢሜቲዛ ማዶ ሚሽ ኤካዳ ዬሩሳላሚያ ባይስ።

26 ጋሶይካ ማቂዶኒያኒኔ ኣካያን ዲዛ ማንቆታ ማዳና ጸሳ ዴሬይ ዴንዲዴስ።

27 ሃይሳ ሃ ማዶዛ ኢስቲ ባ ዶሳን ኢሚዳይ ኢስቲ ኦላናስ ቤሲዛ ጊሻሳ፤ ኣይዛቤቲ ኣይሁዳታራ ኢሲፌ ኣያና ኣንጆ ኤኪዛይታ ጊዲኮ ኢስቲካ ባስ ዲዛ ቢታ ኣንጆን ኣይሁዳታ ማዳናስ ቤሲስ።

28 ሄሳ ጊሻስ ሃይሳ ሸቂዳ ማዶ ሚሻ ዬሩሳላሚን ኢሚዳፔ ጉዬ ኢንቴ ኣቻራ ታ ኢስፔኔ ባና።

29 ታ ሄ ኢንቴኮ ባሼ ኢንቴስ ኪርስቶሳ ኣንጆ ኩንላ ኤካ ባናይሳ ታ ኤራይስ።

30 ታ ኢሻቶ! ታኒ ጸሳ ዋሳን ባጼቲዛ ማላ ኢንቴካ ታናራ ባጼታና ማላ ታ ኢንቴና ጎዳ ዬሱስ ኪርስቶሳኒኔ ጸሎ ኣያና ሲቆን ዋሳይስ።

31 ታኒ ዩሁዳን ዲዛ ኣማኖንታ ኣሳ ኩሼፔ ኣታና ማላኔ ዬሩሳላሚን ዲዛ ታ ኦሶይካ ሄን ኣማኒዛይታ ኣቻን ኤኬታና ማላ ታስ ዋሲቴ።

32 ሄሲካ ጸሳ ሹኔ ማላ ሄ ኢንቴኮ ታ ኡፋይሳራ ባና ማላኔ ኢንቴናራ ኢሲፌ ሸምፓናሳ።

33 ሳርቴላ ጎዳይ ኢንቴናራ ኡባታራ ጊዶ። ኣሚን።

16

ሳሮካ

1 ከንኪራኦሴ ዋሳ ኬላን ኦሊዛ አማኔቲዳ ሚቹዮ ፔቤኖ አንቲሰ ሃዳራ ጋይሰ።

2 አማኒዛ አሳሰ ቤሲዛ ሞኮ አንቲ ኢዞ ጎዳ ሱንላን ሞኪ ኤካና ማላኔ ኢዛ አንቲፌ ኮይዛ ኣይ ሚሻንካ አንቲ ኢዞ ማዳና ማላ ታ አንቲና ቆፍሳይሰ።

3 ካሴ ታናራ ጎዳ ዬሱሰ ከርሰቶሳሰ ኢሲፌ ኦሊዳ ጸርሲቁላሰኔ ኣቁላሰ ታ ሳሮካ ጋሊቲ።

4 ኢሰቲ ታ ጊሻሰ ሃይቃና ጋካናሰ ባና ኣሊ አሚዳ፤ ታና ጸላላ ጊዶንታ ኣይዛቤታፔ አማኒዳይቲካ ኢሰታ ጋላቲቲሰ።

5 ኢሰታ ኬላን ዲዛ አማኒዛ አሳካ ሳሮ ጊቲ፤ ኢሲያፔ ኮይሮ ከርሰቶሳን አማኒዳ ታ ሲቆዛ ኤጼኔጾሴ ሳሮ ጊቲ።

6 አንቲሰ ዳሮ ዳቡርዳሮ ማራሞ ሳሮ ጊቲ።

7 ታናራ ኢሲፌ ቃሼቲዳ ኣንዲራቆኔኔ ዩኒያሴ * ሳሮ ጊቲ፤ ሃይታንቲ ሃዋሬታ ጋርሳን ሎኦ ሱንላራ ዲዛይታኔ ከርሰቶሳ ታፔ ካሴ አማኒዳይታ።

8 ታኒ ጎዳ ባጋራ ዳሮ ሲቁዛ ጸልያጾኔ ሳሮ ጊቲ።

9 ከርሰቶሳ ኦሶ ታናራ ኢሲፌ ኦሊዛ ኢሮባኖኔኔ ታ ሲቁዛ ሴንጸኬካ ሳሮ ጊቲ።

10 ከርሰቶሳን ኢዛ አማኖይ ፓጩቲዲ ጋላቲቲዳ ኤጼሴኔሴሰ ታ ሳሮካ ጋሊቲ፤ ኣርሲጸባሎሶ ኣሳሲካ ታ ሳሮካ ጋሊቲ።

11 ታ ዳቦ ሄሮዲያና ሳሮ ጊቲ፤ ጎዳን ዲዛ ኒሪቃሶሶ ኣሳ ሳሮ ጊቲ።

12 ጎዳን ጊዲዲ ሚኖቲላን ኦሊዛ ማጫሳታ ቲሮፊሞኖኔ ጸርፊሞኖ ሳሮ ጊቲ፤ ጎዳሰ ኦሶን ዳሮ ዳቡርዳሪሰ ከርሰቶሳን ታኒ ኢዞ ሲቁዛ ጸርሲዲሰ ታ ሳሮካ ጋሊቲ።

13 ጎዳን ዶሬቲዳ ኤሩፎኔሰ፡ ታሲኔ ኢዛሰ ኣዮ ጊዲዳሪሰ ታ ሳሮካ ዮቲቲ።

14 ኣሰቁሮኔሰ፡ ኣፊላሶኔሰ፡ ሄሮሜኔሰ፡ ጳጸሮባኔሰ፡ ሄሮማኔሰኔ ኢሰታራ ዲዛ አሻታ ኡባታሰ ታ ሳሮካ ጋሊቲ።

15 ፊሉጎኔሰ፡ ዩሊያሰ፡ ኔሪያሲኔ ኢዛ ሚቹይሰ ሄሳዞካ ኣልጾኔሰ፡ ኢሰታራ ዲዛ አማኒዛይታሲካ ታ ሳሮካ ጋሊቲ።

16 ኢሶይ ኢሳ ዬሪ ዬሪ ኤኪዲ ሳሮኬቲቲ፤ ከርሰቶሳን አማኒዛ ዋሳ ኬላ ኣሳይ ዉሪካ አንቲና ሳሮ ጌሰ።

17 ታ አሻቶ! ኣሳ ጋርሳን ሻኬቲላ ማጳዛይታፔኔ አንቲ ታማርዳ ቲሚርታ ኤኮንታ ኢጾን አንቲሰ ቆጶ ጊዲዛ ኣሳታፔ አንቲ ናጌቲቲ።

16:3 ሃዋ 18:2 * 16:7 ዩኒያሴ፡ ዩኒያሴ ኢሲ ኢሲ ጌሻ ማጸፋቲ ዮሊያ ጌቲሰ።

16:13 ማር 15:21

18 ሄይታንታ ማላ አሳቲ ዬሱስ ኪርሰቶሳስ ኦሊዛይታ ጊዶንታ ባ ቃንፋ ካፋ ገሻስ ኦሊዛይታ፤ ሹጎ ቃላራ ሃሳያኒኔ ዋዚና ኪያ አሳታ ባሌሌቲስ።

19 አንቴ ሚሺራሾ ቃላስ አዛዜቲዛይታ ጊዲዲይሳ አሲ ወሪ ሲዪዴስ፤ ሄሲካ ታና ዳሮ ኡፋይሲዴስ፤ ጊዲኮካ አንቴ ሎኦ ሃኖስ ጨንጫታ ቃሴ ኢታ ኦሶስ ኤያታ ጊዳና ማላ ታ ኮያይስ።

20 ሳሮቴፋ ጎዳይ ጸላኤ ኤሶን አንቴ ቶሆ ጋርስ አሊ ዲንጨጫና።

ጎዳ ዬሱስ ኪርሰቶሳ ኪያቴሊ አንቴናራ ጊዶ።

21 ታናራ ኢሲፌ ኦሊዛ ጸምቶሲ ቃሴካ ታ ዳቦ ሉቂዮሲ፤ ኢያሶኔይኔ ሱሲጸጺርሲ አንቴና ሳሮ ሳሮ ጌቲስ።

22 ሃይሳ ኪታ ጸፊዳይ ታኒ ጸሪጸዮሲ አንቴና ጎዳ ሱንፋን ሳሮ ጋይስ።

23 ታኒኔ ሃይሳን ዲዛ ኩሜፋ ዋሳ ኬፋ አሳይ ሞኪ ኤኪዛ ጋዪዮሲካ አንቴና ሳሮ ጌስ፤ ካታማ ሚሻ ኦይኪዛ ኤሪሰጸሲኔ ኦ ኢሻ ቆኦጸርሲ አንቴና ሳሮ ጌቲስ።

24 ጎዳ ዬሱስ ኪርሰቶሳ ኪያቴሊ አንቴናራ ኡባታራ ጊዶ። አሚን።

25 ታኒ ዮቲዛ ሚሺራሾ ቃላይ ዬሱስ ኪርሰቶሳ ገሻስ ዮቴቲዛ ኪታይኔ ቤኒ ዋዴፔ ዶሚዲ ቆታን ጋምኢዲ ሃኢ ቃሴ ቆንጨዳ ቱማ ጹራ ባጋራ ኢዚ አንቴና አማኖን ኤሳናስ ዳንዳይስ።

26 ሃኢ ቃሴ ሃይሲ ቱማይ ቆንጨዴስ፤ ሜርና ጸሳ አዛዞን ወሪካ አማኒዲ አዛዜታና ማላ ናቤታ ማጸፋ ባጋራ ዴሬቲ ወሪካ ኢዛ ኤራና ማላ ሃኒዴስ።

27 ኢዚ ጸላላ ኤራ ጊዲዳ ጎዳስ ዬሱስ ኪርሰቶሳ ባጋራ ሜርና ቦንቾይ ኢዛስ ጊዶ! አሚን።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b